




3766

Ex
Vibris P. Barthol
Schwarz Althufan
1803.



Digitized by the Internet Archive
in 2012 with funding from
Research Library, The Getty Research Institute

DE USU
ET
SYTSEMATICA DEDUCTIONE
JURIS NATURALIS
ET
ECCLESIASTICI
PUBLICE
COMMENTARIOLUM.

AUCTORE
JACOBO ZALLINGER

SS. THEOLOGIÆ DOCTORE,
ET SS. CANONUM PROFESSORE PUBLICO, ORDINARIO,



CUM APPROBATIONE R. R. ORDINARIATUS.

AUGUSTÆ VINDELICORUM.
APUD MATTHÆI RIEGER P. M. FILIOS.
MDCCLXXXIV.



Principia rerum prius requirenda sunt, ut earum notitia plenior possit haberi. Tunc enim facilius poterunt demum intelligi, cum earum origines discantur. *S. Ambrosius in Proœmio Comment. Epist. ad Romanos.*





AUCTOR INSTITUTIONUM
JURIS NATURALIS
ET
ECCLESIASTICI PUBLICI

T H E O P H I L O

DILECTO DISCIPULO

CANONICARUM RERUM STUDIOSSIMO

SALUTEM, ALACRITATEM, BONOS PROGRESSUS,
DIVINÆ GRATIÆ
UBERTATEM, AC SUAVITATEM.

Habes nunc Theophile, quas a me frequen-
ter expetiisti, Institutiones iuris naturalis,
& ecclesiastici publici, quodque incredibili te
voluptate afficiet, habes illas BEATISSIMO inscri-
ptas NOMINI, communique Parenti christiani
orbis, supremo ac universali Pastori, & sacro-
sanctæ Ecclesiæ summo Rectori dicatas, dedica-
tasque; cuius ante biennium tu quidem iterato



aspiciendi, admirandique, ego vero & alloquendi, & venerandos osculandi pedes felicissima, ut meministi, sorte gavisi uterque sumus. Ut vero operis mei in quinque distributi libros, quod maiore, quam existimari a te solet, labore contentioneque stetit, institutum cognoscas breviter, perspicueque; commentariolum, quod vides, exaravi, quo & consilii mei explicatam rationem, & innumerabilium rerum ordine digestarum adumbratam formam reperies, ea nempe accuratione, qua ad conspiciendum velut uno obtutu Iuris Naturalis & Ecclesiastici publici amplissimum campum iuvare posse videbaris. Et quoniam longæ cohærentesque tractationes, de difficilibus præsertim atque a sensu remotis rebus, neque ætati nostræ, neque tuo, ut quidem ais, ingenio satis accommodatæ sunt; idcirco pluribus articulis membrisque distincta oratione utar, eo nempe pacto, ut non minore studio attentioneque scriptioni meæ insistas, quam differentem audire me consuevisti, neque tam mandes memoriæ, quæ legendo acceperis, quam expendas ipse, & volvas animo, & quodammodo pervadas illa ingenii perspicacia, quam a natura nactus es singularem, & præstantissimis magistris usus, bonarum artium studiis mirifice adhuc excoluisti.




§. I.

Sitne opera danda disciplinæ naturalis iuris.

Nequaquam verendum nobis est, Theophile, ut, qui in numero literatorum hominum haberi volunt, quorum innumerabilis nunc turba est, ii consilium a me susceptum investigandi naturæ jus, omnesque illius explicandi partes probent. Istiusmodi enim res est, quæ omnium ore celebratur scriptisque, & a nonnullis quidem hominibus tanto prædicatur opere, ut præ disciplina naturalis iuris præstantissima venerabilium Patrum volumina, virorumque doctissimorum de re morali commentaria aspernari, quodque effari horror est, ipsum propemodum Evangelium fastidire videantur. Atque utinam hi quidem, qua par est, solertia, veritatisque studio scrutarentur naturam rerum hominisque, neque naturalibus deessent explendis officiis; quam cito illis divini Numinis benignissima providentia sacrosanctæ religionis aditum patefaceret, longeque sublimiori ipsos collustraret luce! Nunc vero haud absimiles desidi, quem nosti, servo se præbent, qui unicum, quod obtinuerat, talentum defodit in terram, nullo quæsito lucro, ac ne ullo quidem negotiandi adhibito labore. *Serve nequam*, inquiet severus iudex, *ex ore tuo te iudico*; ipsius naturæ, quam iactitas, præcepto



adstringebaris & inquirendi in veram religionem, & inventam arripiendi, & arreptam profitendi. Neque vero aut inveniendi opportunitas, aut arripiendi facultas, aut tempus deerat profitendi. Quæ quidem Theophile, haud leviter a me tractata primo mox libro invenies. Illud nunc quæres, in eamne opinionem concedam, ut disciplinam naturalis iuris necessariam ducam hominibus, dignamque commendatione illa, qua efferri a nonnullis solet. Ad quam ego interrogationem in hunc modum respondeo, ut disciplinæ genus hoc, quemadmodum ab institutione vitæ christianæ, aliisque scientiis segregatum, atque in hanc, quam præfert, formam redactum est, ad vitæ quidem honestatem, omnemque colendam probitatem nequaquam requiri putem; ad scientias vero sublimiores, ac Iurisprudentiam inprimis rite pertractandas, parum abest, quin necessariam pronunciem naturalis iuris, atque universarum ejus partium accuratam explanationem. Ultra igitur tibi progredi, Theophile, nunc videor, ac ipse alias affirmabam, qui ad percipiendam Canonum disciplinam Institutiones naturalis iuris perutiles fore dixeram, necessarias non dixeram. At ego cedendum temporibus nunc dico; quamquam ne id quidem magnopere probari tibi sentiam, utpote novarum rerum minime cupido. Verum ut totum, quod sentio



sentio, perpendas, etiam atque etiam te hortor. Fuit, fuit illud tempus, quo sacræ auctoritati assurgerent homines nostri ea, qua oportebat, reverentia, neque obluſtari auderent, quando sacri canones ad dirimendas, quæ inciderant, controversas causas proferebantur in medium. Actum quidem satis erat, Iurisprudentiæ canonicæ studiosis, si sacræ antiquitatis regulas rite interpretari, atque ad proposita negotia accommodare nossent. Nunc vero ipsam impetunt non modo singularium canonum vim, sed Ecclesiæ canones sancientis auctoritatem, atque armis impetunt ex disciplina naturalis iuris maxime petitis; quod quidem ad eum non ignoras Theophile, ut ipse sæpenumero ingemueris. Sic ergo cedendum temporibus reor, ut aliis atque aliis hostium Ecclesiæ insultibus non idem perpetuo defensionis genus opponendum statuam. Ius philosophicum appetunt homines, idque literato orbi se donasse gloriantur scriptores non pauci; de ipsa adeo religione, iuribusque sacris philosophari avent: civilis imperii maiestatem obtendunt: boni communis publicæque rei commoda ostentant, quibus nefas esse aiunt per canones impedimenta poni. Neque vero paucas excogitarunt artes, quibus iustitiæ ac veritatis speciem effingentes, sacrosanctæ Ecclesiæ potestatem concidant, & prope in nihilum



redigant; *nexus* illos, quos perpetuo memorant, sacras inter & profanas causas, illud *cavendi ius*, nequid ex rebus Ecclesiae detrimenti capiat respublica, illa, quæ nuncupant, *mixta negotia*, illa *adiaphora*, quæ in religione inesse dicunt, illa *accidentalia* Prælatorum Ecclesiae iura, necessitatem illam *mediorum ad finem*, ius illud *circa sacra*, quæque sunt generis istius, ex naturali, publicoque iure depromi posse, ac debere censent, atque ita depromi, ut demonstrationibus confirmari queant, quæ mathematica demonstrandi accuratatione haud inferiores sint. Hac igitur ex parte cum in veneranda Ecclesiae & Canonum iura impressionem faciant scriptores tot, tantoque furore: paratam esse oportere defensionem, non, opinor Theophile inficiaberis.

§. II.

Ius philosophicum sacris Ecclesiae iuribus infestum esse non potest.

Non sum nescius, omnem Philosophiam, omniaque eius inventa & cogitata, si modo philosophiæ nomen sustineant, nihil religioni nostræ, nihil Ecclesiae detrimenti afferre posse; cum verum vero obesse minime queat. At enim philosophandi genus est quoddam fallax, implexum, captiosumque, de quo gravissima extat Doctoris gentium admonitio: *Videte, ne quis vos*
deci-




decipiat per philosophiam, & inanem fallaciam, secundum traditionem hominum, secundum elementa mundi. (*) Quo quidem nomine profanæ scientiæ ac Politicæ elementa intelligi posse eruditissimus Calmetus docet. Neque vero ego nimium mihi arrogasse videbor, si ad ius philosophicum provocantibus, de hæc toto, quo uti solent, philosophiæ genere respondere ac disceptare aggrediar. Meministi enim Theophile, quantopere in philosophicis tractationibus, non illis solum physico-mathematicis, queis secundum Kepleri ac Newtoni felicia inventa corporum totalium vires mutuæ, viriumque leges analytica inductione eruuntur, demonstranturque, sed in dialecticis quoque ac metaphysicis contemplationibus, & evolvendis notionibus, & inquirendis idearum originibus, animique cogitatis, tanquam nucleo a cortice verborum disiungendo, & vocabulorum dispellendis ludibriis defudaverim; cujus laboris, etsi tum haud satis providerim, amplissimum nunc fructum capio, ut pænitere me neque eorum studiorum, neque scriptorum debeat. Ac ne calumniæ in me impingendæ via pateat, illud etiam atque etiam profiteor, non de singularibus me factis agere, ab utraque potestate provenerint, Ecclesiastica, aut Civili; sed totum id, quod commentatus sum

(*) Coloss. II. 8.



in Institutionibus meis, ad generales pertinere
sacrorum iurium theorias, quas scriptores qui-
dam hodie proferunt, principiaque illa, quibus
confirmare easdem student, examinanda. Facta
enim singularia sexcentis fere implicata adiun-
ctis, atque obvoluta sunt, dein arcanis etiam
rationibus sæpenumero imbuta, de quibus defi-
niri ac pronunciari cum ab homine privato
non debeat, ob eandem, quam memoravi cau-
sam, vix ac ne vix quidem possit. At si universe
de sacris iuribus statuunt scriptores, easque
per generales constringant regulas, tum sane
tentemus hasce regulas, & diiudicemus: si ci-
vilis status, imperiique finem, si publicam feli-
citatem nominent, dispiciamus hosce fines, quos
hominibus natura proposuit, constituamus finium
ordinem, ordinum gradus designemus, aptas-
que iis tenendis gradibus expendamus rationes:
si profanarum sacrarumque rerum nexum memo-
rent; cuiusmodi is nexus sit, quorsum perti-
neat, quid iuris pariat, ponderemus: si adia-
phora appellent, quæ in exercenda religione
insunt, figamus sane notionem ejus, quod adia-
phorum est: si substantialia, quæ vocant, Ec-
clesiæ iura ab accidentalibus determinari volunt,
videamus, anne exeri omnino substantialia
queant, ut nihil insit, quod non continuo acci-
dentale nuncupent; universe autem caveamus
dili-



diligenter, ne tritis jam verbis, atque inanibus aut ambiguis vocabulis illudi nobis patiamur.

§. III.

Imo proficuum est, si recta via atque ordine tractetur.

Sed me illud docuit rerum philosophicarum tractatio, nihil esse ad refellendas falsas hypotheses efficacius, nihil ad veritatem patefaciendam aptius, illustriusque, ac similium phænomenorum inductio, quam vocant, similiumque legum & causarum confirmata complexio, quam *analogiam* naturæ nuncupant, ac demonstrandæ eiusdem nativæ simplicitati, veritatisque legum & causarum maxime consentaneam esse uno ore censent omnes, qui non penitus aliena loquuntur, philosophantes. Atqui in hac quoque Philosophiæ parte, quæ mores hominum actionesque regit, eadem sane & inductio similium casuum, decisionumque, & confirmata ex iis iurium complexio, & analogia iusti & æqui, & naturalium principiorum legumque simplicitas perinde, ni fallor, ac alia quavis parte locum habet. At nempe huic tanti momenti veritati perspiciendæ fatis non est, fragmenta duntaxat quædam de iurisprudencia naturali decerpisse, ac particulas alijs atque alijs delibatas



batas locis, nullo cohærentes nexu, nulla principiorum consensione, nulla deductionum similitudine comparata, degustasse, nisi universa inde a primis naturæ fontibus derivata series & continuata progressio iurium & obligationum habeatur præ oculis, animoque attento & a perturbationibus libero expendatur, volvaturque ex omni parte, ac figatur in mente, firmiterque teneatur. Quæ inter homines geruntur quocunque statu, seu primigenium quis cogitet, seu adventitium & sociale, ipsum adeo civilem inter binos cives, communi eos quidem imperio subiectos, libertate tamen civili inter se gaudentes, quæ denique inter gentes aguntur ceu morales personas liberas, alteram ab altera independentes, eadem prope sunt negotia, iisdem dirigenda iuribus, nempe ad animum, ad corpus, ad res externas, quæ nobis adhærescunt quodammodo, pertinentia. Vide Theophile, unde similitudo casuum, factorum, controversiarum proveniat, quæ non potest non similia iura, similes decisiones, iuriumque ac decisionum similia principia continere. Atque in his *iurium analogiam* sitam arbitror, ut similibus casibus, factis, controversiis, quacunque hominum societate, aut iurisprudentiæ parte occurrentibus similia principia, iura, pronunciata respondere putem. Age nunc, & catholicum de ecclesiastica & politica potestate systema in memoriam revoca,

ut

utraq;ue summa in suo genere, ut aiunt, neutra de-
 dependente ab altera. Quæso te, illas eodem tem-
 pore recale argumentandi formas, quas scriptores
 nostri, qui catholico se systemati addictos pro-
 fitentur, identidem adhibent, & prope ad nau-
 seam recoquunt, illum nexum, inquam, illud
 cavendi ius, illa mixta negotia, illam medio-
 rum ad finem necessitatem, illa adiaphora, ac-
 cidentalia &c. ac si istiusmodi argumentandi
 formas neque inter privatos homines primæva
 libertate aut civili fruente, neque inter socie-
 tates aut minores in statu Anarchico, aut ma-
 ximas perfectasque, inter diversas nimirum li-
 berasque gentes ullum habere locum, usumque
 vides; qualem eadem inter sacram Ecclesiæ,
 politicamque civitatis potestatem vim habere
 usumque possint, confice: ac si dein eadem ar-
 gumentandi formæ ad singulares personas vel
 morales applicatæ, ad absolutum vel hypothet-
 icum statum, ad minores societates vel maxi-
 mas adhibitæ, nihil sane nisi Hobbesianum bel-
 lum gignerent; quid de usu earundem adversus
 sacra Ecclesiæ iura cogitabis, quid decides, quid
 pronunciabis? Atque hoc est, mi Theophile, in
 in quo pervestigatis naturæ principiis, & origi-
 nibus naturalis iuris repertis, indeque derivata
 conclusionum serie, deducto officiorum ordine,
 factaque casuum, iurium, decisionum compa-
 ratio-



ratione, atque inventa iurium analogia merito demum exultaret ac triumpharet oratio mea.

§. IV.


Expenduntur alia commoda ex disciplina naturalis iuris provenientia.

His quidem nunc indicatis, quæ temporibus tantum accommodata sunt, aliæ prætermitti non debent ingentes utilitates, quæ ex institutione naturalis iuris a primis naturæ fontibus ducta, perpetuoque doctrinæ ordine continuata in discentes proficiscuntur. Sæpe cum viris doctis de optimo institutionis genere sermonem habui, sæpe de copia & varietate tractandarum rerum, de brevitate angustisque non solius temporis, sed humani quoque ingenii collocutus sum. Atque ego quidem, iis minime dissentientibus, in eam semper abii sententiam, ut nihil scientiarum candidatis optabilius, atque ad faciendos, quam fieri potest, progressus maximos accommodatius statuerem, quam si de præposita sibi facultate præ manibus haberent librum, in quo rerum, quas ex ore doctoris excepturi essent, brevis illa quidem, at accurata tamen, satisque perfecta descriptio contineretur, ordine digesta, iusta proportionem, aptoque nexu partium concinnata, ut inde arrepta disciplinæ, omniumque eius partium distincta cognitione,

ant-



animoque infixa, siqua deinceps ad eandem pertinentia disciplinam occurrerent, ea ad proprias referre fedes, certisque velut locis afferre possent; quo fieret, ut novarum cognitione rerum non obrueretur mens, sed excoleretur, nec obscurari possent antea haustæ notitiæ, sed perfici, locupletari, extendi. Ac Iurisprudentia quidem naturalis non ea est facultas, quæ coacervatis aliarum disciplinarum doctrinis constet, & alienis quasi laciniis ac centonibus compacta sit; sed ipsa suas radices habet, sua germina, suos flores & fructus: ipsa per se quodammodo subsistit, non inhæret in alia scientia: suis nititur principiis, suas profert conclusiones, nihil ex aliis mutuatur; sed mutuum aliis dat disciplinis, ut adeo, siqua existit iurium ambiguitas, aut siqua gravior in scholis controversia agitur, ea vix habeat exitum, nisi dirimente naturali iure, aut certe quidem consilium, ac velut lumen subministrante; id quod multis comprobare exemplis difficile haud est. Multa quidem, Theophile, de genuina interpretatione legum, ipsisque ad propositas quæstiones rite applicandis acute excogitata sunt a viris sapientibus, & animadversa; sed præterquam quod ipsæ illæ interpretandi regulæ naturalem maxime æquitatem sapiant, exhibeantque, tum nec usum satis tutum sine ductu naturalis iuris habere



bere mihi videntur. Atque hi institutionis, de qua agimus, uti præclari fructus sunt, minimeque contemnendi; ita ad exquisitam comparandam doctrinam, qualem depravatio poscit ætatis nostræ, plane necessarii censerī debent. At nempe spes non est, eos proventuros in audientium animis, nisi vagam coerceant librorum lectionem, nisi inde a principiis ad omnes eiusdem institutionis partes certa via & ordine procedant, nisi nihil leviter transiliant, nisi insistant in singulis disciplinæ capitibus, ea animo comprehendere studeant, in iis exerceantur. Quapropter cavendum est diligenter, ne singularibus quibusdam ambiguarum quæstionum disceptationibus ita distineantur, ut præcedentium cognitionum, atque earum, quæ consequi debent, nexus abrumpatur, atque inceptus cursus ea, qua necesse est, æquabilitate ad finem perducī haud queat. Si pugnandum est, extra castra efferantur signa, ne turbetur ordo castrorum. Non enim is ego sum, qui omnes exercitationes, disputationesque reprehendam, sed eas demum, quæ continuatæ institutioni impedimento sunt, quæque iacturam temporis & cognitionum perutilium pariunt, resque momenti summi intactas præterire, aut leviter modo attingere cogunt. Ad hanc instituendi rationem respexisse puto Iustinianum, cum diceret: *Iura ita videntur*

tur

tur posse tradi commodissime, si primo levi ac simplici via, post deinde diligentissima atque exactissima interpretatione, singula tradantur: alioquin si statim ab initio rudem adhuc & infirmum animum studiosi, multitudine ac varietate rerum oneraverimus, duorum alterum, aut desertorem studiorum efficiemus, aut cum magno labore, sæpe etiam cum diffidentia, quæ plerumque iuvenes avertit, serius ad id perducemus, ad quod, leviori via ductus, sine magno labore, & sine ulla diffidentia, maturius perducipotuiisset. (*)

§. V.

Hæc commoda Iurisprudentiæ naturalis soli Philosophiæ & rationi humanæ in acceptis ferenda non sunt.

Cave, Theophile, ne aliter, ac ipse velim, accipias, quæ in laudem disciplinæ iuris naturalis dicta a me sunt. Est ea quidem ipsa per se facultas singularis, suis nixa principiis, & quasi sœcunda conclusionibus: quæ ut per se ipsam consistat, nihil mutuetur ab aliis scientiis; quin aliis largiter det mutuum. At enim non est totum id, profecto non est soli philosophiæ, humanæque rationis vi adscribendum; nisi enim celsiore quadam luce, ductuque regi

se

(*) §. 2. Inst. de J. & J.



se finat hominum ingenium, fere usuvenit, ut ipsa ratione sua, cui temere præsidunt, in foedissimos errores abripiantur. Testes habemus omnes ætates, omnes nationes, omnes hominum classes. Inde factum fuisse, mi Theophile existimandum est, ut optimi Numinis providentia, quæ perpetuo consulit humanis rebus, ad rationis vim, quæ nunquam deerat hominibus, alia præterea, atque alia ad vitæ honestatem adminicula adiunxerit, nempe sua ipsius eloquia, monita Patriarcharum & Prophetarum, dictatas a se leges, ipsius divinæ sapientiæ humanam indutæ naturam publicum magisterium, perpetuumque, quod eadem instituit, religionis tribunal, ubi non posset non certissima de morum honestate veritas definiri. Age percurramus hæc strictim, ut, qui rationi nihil non tribuunt in humana regenda vita, quam eadem imbecilla sit, supernoque auxilio egeat, ipsis divinæ providentiæ consiliis de errore suo convincantur; qua quidem brevicula recensione quædam veluti origo iurisprudentiæ naturalis patefiet. *Deus hominem rectum fecit*, inquit Ecclesiastes (*), recti nimirum, & honesti & iusti æstimatorem, & sectatorem. Hoc idem pluribus verbis alio divini codicis libro exprimitur, in quo de primis hominum parentibus differitur in hunc modum

(*) Eccl. VII. 30.



dum: *Disciplina intellectus replevit illos: creavit illis scientiam spiritus — Et mala Et bona ostendit illis — ut Numen sanctificationis collaudent — ut magnalia enarrent operum ejus (*)*. Ita nimirum ad illustrandam divinam gloriam conditæ sunt res humanæ; de qua re luculente, ni fallor, tractavi in Institutionibus. De recto hoc statu deiecit hominem gravis noxa, qua non extinctum quidem rationis lumen, sed obscuratum fuit, diminutum, & perturbationibus tanquam nebulis circumfufum. Unde mox succurrendum erat cælestibus monitis, doctrinisque; quodque ipsa per se rationis vis attingere poterat, id singulari revelatione explicabatur: *Sub te erit appetitus tuus, Et tu dominaberis illius (**)*. Patrato homicidio, quod dictata rationis fatis vetabant hominibus, posuit Deus in Cain signum, quod in omnium oculos incurreret, & a scelere homines absterneret; neque id ignoravit Lamech: *Septuplum*, ait, *ultio dabitur de Cain (***)*. Ac rationem quidem omnibus hominibus naturâ impertiit; compertum est tamen, quanta morum vitæque difformitas inde a primis temporibus invaluerit; duas in partes scindebatur humanum genus, alique *filii Dei* vocabantur probi nimirum atque integræ vitæ ex progenie Sethi; alii *filii ho-*
B 2 *minum.*

(*) Eccli. XVII. 5.

(**) Genes. IV. 7.

(***) Gen. IV. 24.



minum, iidem inventores artium, urbium conditores, cultores felicitatis eius publicæ, quam nostræ ætatis Philosophi identidem in ore habent; sed caduca illa felicitate, inanique gloria morum vitæque labem expiare haud poterant. Illud pessime factum, ut hanc bonorum malorumque segregationem divisionemque veluti pertæsi homines facta pace, ac communis, ut videtur, caritatis obtentu, sublato pietatis discrimine sese miscerent, iungerentque; tum vero peior parentibus soboles extitit: *gigantes erant super terram in diebus illis: postquam enim ingressi sunt filii Dei ad filias hominum; isti sunt potentes a seculo viri famosi* (*). Eventus mutæ illius communionis, caritatisque is fuit, ut iratum Numen totam eam colluviem communi internecone exhauriret, deleretque. Dubium non est, quin homines illi rationis vi cognorint, ipsique damnarint foeditatem vitæ suæ; sed tamen alia quoque emendandæ vitæ subsidia & incitamenta Numen optimum suppeditavit; misit Noemum *præconem iustitiæ* (**), & ante Noemum miserat Enochum divina iudicia promulgantem; qui quidem maximum malitiæ coercendæ, servandæque naturalis legis incitamentum, non utique a caducis profanisque sumtum rationibus, sed a timore summi Dei petatum proposuit hominibus, idem nempe, quod ad homines poste-

(*) Gen. VI. 4.

(**) II. Petr. II. 5.

posteriorum ætatum omnium pertinet; *prophetavit de his*, inquit S. Judas de improbis agens hominibus ætatis suæ, *septimus ab Adam Enoch, dicens: Ecce venit Dominus in sanctis millibus suis, facere judicium contra omnes, & arguere omnes impios de omnibus operibus impietatis eorum* (*). Vides, Theophile, primis illis jam tum temporibus rationis humanæ lumini aliam Deum addidisse lucem eloquii sui, & prodigiorum, & prophetiarum, & adhortationum. Quid? expurgata aquis tellure divina novimus præcepta hominibus promulgata fuisse, virorumque sanctorum documenta & traditiones conservatas, quæ subsidio essent rationi humanæ. Ea præcepta traditionesque colligens Joannes Seldenus Ictus anglus ius Naturæ & gentium secundum Hebræorum disciplinam effinxit. Segregato postmodum a ceteris gentibus hebraico populo nonne, quæ natura cordibus hominum insculpserat, ea in lapideis tabulis exaravit Deus? *Scriptum est in tabulis*, inquit S. Augustinus (**), *quod in corde non legebant; non enim scriptum non habebant, sed legere volebant. Oppositum est oculis eorum, quod in conscientia legere cogarentur, & quasi forinsecus admotæ voce Dei ad interiora sua homo compulsus.* Adde libros legis mosaicæ, libros morales ac sapientiales ut vocant, histori-

(*) Epist. Jud. v. 14. 15.

(**) In Psalm LVII.



cos dein, ac volumina, sermonesque Prophetarum, in quibus omnia prope naturæ præcepta explicantur, illustrantur, confirmantur. Si una ratio hominum iis perspiciendis præceptis sufficit; cur inutilia tot, otiosaque scripta dictavit divinus spiritus? Sed his quidem scripturis maxima mortalium pars carebat. Philosophos igitur ita rationem acuisse credes, ut puram doctrinam, integrumque ac sanum proferrent naturæ ius? in Aristotelis Peripato, in Zenonis porticu, in horto Epicuri, aut Platonis academia rationis vis effloruit? Ostenderunt, Theophile, & abunde ostenderunt eruditissimi homines, quantopere sapientes illi desipuerint, aberrarint, quam turpiter cæcutierint; tu Epistolam ad Romanos cogita, in qua de sensu ac vita sapientum rationi suæ præfidentium testimonium habebis omni exceptione maius. At delapsa in orbem divina sapientia, ac diffusa evangelii luce tum demum patuit, & quantis auxiliis egeat hominum ratio, & quantum ab humani ingenii opinionationibus illibata veritas disset. Unde igitur in tanta coelestis doctrinæ luce tot prodierunt errores tenebricosi? Non ignoras Theophile, eas, quæ de moribus, ac naturali iure tractabant, damnatas theses; sed diligunt homines magis tenebras quam lucem. Paucula recensebo; de polygamia ex calculo alter-

alterutrius sexus definiendum docent, nec indulgendum putant, ut in regione, in qua illa moribus recepta est, religionem quis amplectatur, quæ eandem prohibet: divortia passim licita censent, falsiloquii & simulationis non honestatem solum, sed necessitatem propugnant: usuram ab iniustitia absolvunt: concubinatum laudant: fornicationum turpitudinem matrimonii temporarii nomine, velut pallio tegunt: iuramenta promissoria peculiarem parere obligationem negant: ignorat humana ratio, aiunt, externo cultu Deum colendum esse: leges naturales sine Deo definiri a se posse iactitant. Cur, inquis Theophile, ista commemorem? nempe ut infirmitatem humanæ rationis sentias. Nec vero, si de privato naturæ iure quæritur, magnopere dissentientes habebo homines orthodoxos; at ego ultra progredior, argumentumque proveho. Ius illud publicum universale, quod tantopere hodie iactitant, iuris naturalis, ut ipsi fatentur, pars est, nempe ratione erutum, ratione auctum, extensumque, ratione in eam redactum formam, iis instructum principiis, iis circa Sacra refertum iuribus, quibus auctum, extensumque, instructum, ac refertum a scriptoribus nonnullis orbi literato obtruditur. Quam infirma, & fallax est humana ratio, præsertim cupiditatibus sollicitata, odiis impulsæ, assenta-



tionis studio corrupta! Si originem huius iuris, qua parte nexum pertractat cum negotiis ecclesiasticis, inquiras, ea ex Protestantium castris prodiit. Samuel quidem Pufendorfius libellum edidit *de habitu religionis erga statum civilem*, ob eam causam a Iusto Henningio Boehmero sæpe laudatus. Quo vero collimarit toto eo opere, nempe ut sacrum imperium everteret, & Hierarchiæ Ecclesiasticæ a Christo institutæ fundamenta subrueret, ubique prodit: ut vel hac de causa Boehmero, & aliis Protestantium Doctoribus Iurisconsultis æque ac Theologis in deliciis, imo & maximo in pretio fuerit; uti Joannes Franciscus Buddeus in *Isagoge Historico-Theologica*. L. Poster. c. V. §. 7. in nota pag. 695. fatetur, inquiens: *Quo pacto Iuris Ecclesiastici principia emendanda sint, primus, ni fallor, viam monstravit Samuel Pufendorfius in libello elegantissimo de habitu religionis ad vitam civilem - - in eoque solide demonstravit, Ecclesiam non instar reipublicæ seu status independentis, sed potius instar collegii cuiusdam esse concipiendam.* Quis ex istiusmodi fonte sanam dimanare circa res ecclesiasticas doctrinam speret? Multi tamen inde hauscrunt, hauriuntque, iique fere expertes theologiarum disciplinarum. Bonum commune, publicaque felicitas, quæ cum plausu effertur, venditur, ostentatur, non paucos fallit, præsertim cum ean-

eandem intercipi catholico systemate & sibi persuadere & aliis velint. Nihil de his iuris naturæ, ac publici maxime scriptoribus aptius afferri potest, ac illa S. Augustini de antiquis Philosophis animadversio. *Fuere, inquit, quidam Philosophi, de virtutibus & vitiis subtilia multa tractantes, dividentes, definientes, ratiocinationes acutissimas concludentes, libros implentes, suam sapientiam buccis crepitantibus venditantes: qui etiam dicere auderent hominibus: nos sequimini, sectam nostram tenete, si vultis beate vivere (*)*. Sed dominus novit cogitationes sapientium, quoniam vanæ sunt (**).

§. VI.

Veterum & novorum Philosophorum errores efficere nos cautiores debent in usu rationis.

Non de antiquis hæc Philosophis, iisque alienis a cultu summi Dei, sed de nostris hominibus quibusdam scripsisse sanctum doctorem arbitraris, Theophile, nostrorumque temporum imaginem videre te putas; quippe qui omnem eorum sentiendi, scribendique & iudicandi rationem & narratione acceperis & lectione. Quaquaversus enim opuscula sua, chartulasque dispergunt, & mulierculis quoque, ac rusticanæ

B 5 plebi,

(*) Tract. XLV. in Joan.

(**) I. Cor. III. 20.



plebi, & quibusvis de trivio hominibus offerunt, ut aliquos nummulos conficiant. Nosti Theophile, quod hominum notem genus; sed quo nomine iidem compellendi sint in Latio, non nosti. Si illuminatores dicerem, vim patrii sermonis, ejusque vocis, quam perpetuo in ore habent, haud assequerer. Neque enim orbem terrarum sapientia, qua pollent, operaque sua, & communis rei studio iam illuminatum dicunt, sentiuntque ipsi, etsi omnibus viribus id efficere studeant, contendantque; sed illud modo exprimunt, post longam densamque noctem innumerabilium errorum demum *diluculum* quoddam apud nos comparere, idque ipsorum ingenio, doctrinae, indefessae operae, reique publicae incredibili studio in acceptis ferendum esse. Quapropter Theophile, cum novis rebus nova aptanda sint nomina, in posterum eos DILUCULARIOS (*) vocitabimus. Atque hi quidem humani generis benefactores (veniam dabunt latini huic quoque voculae) institutum nostrum pertractandi naturale ius, nequaquam reprehendent, etiam laudibus ferent in caelum: utrum vero sententias nostras omnes probaturi sint, magnopere solliciti esse, angive non debemus; pleni sunt enim lenitatis atque indulgentiae, ut ipsos sectarios in media catholicae veritatis luce coecutientes benignissime habeant, & errores excusent, &

(*) Aufklärer.

præ-



præiudicatæ opinionis vim causentur, diligenterque moneant, nequis asperis verbis, publicisve reprehensionibus excitare eos, atque ad veritatem adducere audeat. Nunc igitur Dilucularii nomen didicisti Theophile; rem enim & sensa & doctrinam dudum noveras. Neque enim nescire te passus sum illos nexus, illud cavendi ius, illa mixta negotia, illam mediorum ad finem necessitatem, illa adiaphora & accidentalialia, illa, quæ criminantur, genera superstitionum, quæque sunt generis istius, a te quidem ita percepta, ut aliquando festive iocareris Tulliana usus sententia: *Si mihi, homini vehementer occupato, stomachum moveritis, triduo me Publicistam esse profitebor.* Hæc quorsum pertineant, intelligis Theophile; sed quo evasurus sim differendo, nondum videre te arbitror; eo nempe, ut perspicue comprehendas, rationis humanæ seu diluculum seu lumen, siquis supernam respuat sacramque lucem, perquam fallax esse, atque abducere a veritate, salutisque via. Atqui, ais, Naturale ius non sacra auctoritate, sed rationis naturalis vi pervestigari, protrahi & explicari debet. Non id peto, Theophile, ut præcepta naturalis iuris ex sacro codice, conciliorum actis, voluminibus Patrum eruantur, eorumque duntaxat confirmantur auctoritate; sed id modo volo, philosophiæ placitis, ingenii-
que



que humani cogitatis tantum confidere nos & inniti non oportere, ut, nisi sanctioribus principiis doctrinisque revelatis consentanea deprehendamus, quæ ad hominis felicitatem, & honestatem morum pertinent, ea hoc solo ingenio, solaque ratione metiri ac definire nequaquam possimus: id modo volo, ne quis in animum inducat, præcepta illa, iurave naturæ, quæ sacræ auctoritati dissentanea sunt, tamen ex incorrupto rationis lumine provenire: id volo, ne quis veram hominis beatitatem sitam in eo fingat, quod evangelii doctrina, & venerabilium Patrum hominumque sanctissimorum non modo verba, sed exempla quoque reprobant: id denique volo, non oportere quemquam humani ingenii perspicaciam, rationisque vim tanti facere, ut doctrinis sola ratione & ingenio excogitatis conformandam iudicet disciplinam, ac regimen Ecclesiæ, nec potius Ecclesiæ, quæ columna & firmamentum est veritatis, regimini & disciplinæ, & perpetuo usui conformandas doctrinas illas; quis enim sanæ mentis homo inducat in animum, ut ingenioli sui cogitata, eaque ex lutulentis fontibus primo hausta merito præferenda putet sensui, doctrinisque sacrosanctæ Ecclesiæ, quæ divino spiritu regitur, atque auctoritati sacrorum conciliorum, & innumera- bilium Præsulum sapientia & sanctitate insignium
doctri-




doctrinis, & exemplis? Si mathematicas demonstrationes iactitent dilucularii nostri, commiserari licet hominum istorum inscitiam, qui in re morali, cujus usque adeo complicatae & ancipites notiones sunt, demonstrationum mathematicarum nomen usurpent. Equidem memini, ante annos iam bene multos in auctore anglo me legere, non abesse a mathematica perspicuitate, firmitateque propositiones has: lus mihi competit: ergo tibi obligatio incumbit, ne usui mei iuris obsistas. Atqui hanc ipsam argumenti complexionem obscurant dilucularii nostri, infirmantque suis illis, consuetis formulis, quas supra commemoravi. Quid enim? Si tibi nominanti ius tuum ita respondeam: Interest mea quoque, quid agas: nexus est tuas inter measque actiones: ius cavendi mihi est, nequid rebus meis detrimenti inferas, meaque commoda intercipias; consequenter negotia tua mixta censenda sunt, & meo - tua, tuo - mea nuncupanda. Atque hæc quidem, mi Theophile, si de vi atque usu humanæ rationis probe expenderis, mentique tuæ infixeris: verendum tibi haud est, ne, cum doctrinæ, pietatique pari studio des operam, domum tuam supra arenam ædificare videaris (*), omnique doctrinæ vento circumferri debeas (**), semperque
discere

(*) Matth. VII. 26.

(**) Ephes. IV, 14.



discere debeas, nunquam ad scientiam pervenire possis (*). Reliquum est, ut, cum de usu Institutionum mearum, quantum necesse videbatur, dixerim, omnem earum deductionem eo, quo confectæ sunt, ordine ponam ob oculos.



INSTITUTIONUM
IURIS NATURÆ
LIBER I.

IUS NATURÆ PRIVATUM.

C. I.

Inquisitio Naturalis Iuris a contemplatione naturæ inchoanda est.

I. Ne quid obscuritatis pariat ambiguitas vocum, quando ex natura rerum hominisque manare dicimus naturale ius, *naturæ* nomine universitas rerum significatur extra hominem conditarum, sed quæ hominum necessitati, commoditati, honestæ voluptati accommodatæ sunt, quæ apprehendi ab hominibus, teneri, usibus aptari possunt. Accuratio homini de ipso homine cognitio est necessaria ad eruendum ius. Eam dat Analysis, singulatim exhibens mentem, corpus, res externas illas, quæ homini quodammodo adhærescunt.

II.

(*) II. Tim. III. 7.



II. Homo naturæ vinculis quibusdam adstringitur aliis hominibus, sed nemini propius, quam ipse sibi. Omnium arctissime pendet a Deo, summo Conditore, Governatore, Fine ultimo rerum. Is nexus hoc indicatus loco ad actiones hominis applicatur §. IX. & X. ad obligationes naturales §. XI. penitus evolvitur §. LXI. & binis sequentibus: accommodatur ad statum civilem §. CCXXVI. & sequente. §. CCXXXIV. (a) fin. Non enim in ea hæresi sumus, ut eo acutius philosophari nos de naturali iure credamus, quo longius ab eo mentionem summi Numinis removerimus.

III. Ad Analysin naturæ hominis diversi ejus status pertinent, qui segregandi sunt. Statum absolutum non excludere omnem societatem, itidem indicatur §. CCLXVIII.

IV. In natura hominis, in nexu cum aliis, in statibus insunt fines; in finibus inest 1. ordo, 2. in quovis ordine insunt gradus, 3. gradibus respondet proportio & accommodatio mediorum. Hæc tria summi momenti sunt, & per omnem iuris disciplinam vagantur latissime. Inde explicatum habet apparens collisio officiorum. §. XXII. (e). De ordine finium conf. §. LXXX. de mediis §. CVII. Is ordo adventitio statu non turbatur §. CCXXIV.


V. Fructus ex præcedente Analyfi proveniens.

C. II.

Contemplatio naturæ ad cognitiones practicas hominem deducit.

VI. Progressum rationis humanæ a theoretica ad practicam cognitionem cum parum observarent nonnulli,

COR-



contigit, ut theoreticas veritates pro lege habuerint naturali, istamque citra voluntatem summi Dei posse cogitari statuerent.

VII. In practicis cognitionibus distingui oportet; 1. id, quo regitur actio, 2. id, quo libertas afficitur certo modo; 3. denique id, quo proposita cognitione voluntas cietur, & agitur.

VIII. Dictata rationis, quæ insunt in hominibus, legis nomen participant. Rom. II. 14. Si quæritur, quæ vis insit hisce dictatis, reipsa de existentia iuris naturæ quæritur, cujus principium theoretica cognitione contineatur, necesse est.

IX. X. Deductio obligationum, consiliorum, & iurium seu facultatum moralium naturæ fit ex interna relatione ad perfectiones summi Dei.

XI. Resolvitur *obligationis* idea, quæ, cum imaginaria sit, reducenda est ad realem.

XII. Eodem quasi filo deducuntur *consilia* naturæ, ne totum id, quod laudabile aut æquum est, continuo necessitati subiiciatur, repugnante infirmitate naturæ hominis. Inde intelligitur illud: *ius civile neque totum a naturali vel gentium recedit, neque per omnia ei servit.* L. 6. D. de I. & I. Exemplum extat §. CXLIII. (i)

XIII. Iuris seu facultatis moralis a natura concessæ multiplex partitio est. Expenditur illud: *ius ad finem dat ius ad media.* Ceterum quoniam iura data sunt nobis a natura ad fines aptos, nempe ad actiones completas, & naturali fine quodammodo imbutas; ideo quærenti, sitne ius eundi, loquendi, movendi manum, pedemve &c. responderi nequit, nisi addendo finem naturæ consentaneum e. g. sanitatis, negotii, molestiæ

evitandæ causa. Ac tum quoque, si per se finem habet actio, is ab agentis intentione segregandus est, ut tum hac intentione, tum adiunctis spectatis aliud sit ius, alius rectus usus iuris.

C. III.

Obligationum ac iurium naturalium genera varia.

XIV. Sunt obligationes & jura affirmativa & negativa.

XV. Connata & acquisita; quæ inter personas morales maxime elucent §. CCLXX.

XVI. Absoluta & hypothetica, orta ex pactis, dominiis, statibus adventitiis.

XVII. Perfecta & imperfecta. Conf. §. CCLXIX.

XVIII. Interna, & externa; quæ partitio ad tolerantia notionem animo informandam pernecessaria est.

XIX. Personalia, quæ communicari vel abdicari non possunt: & abdicabilia.

C. IV.

Obligationes & iura naturæ reducuntur ad unum principium generale.

XX. Cum maxima sit Doctorum in statuendo eiusmodi principio dissensio, ei componendæ quoquo modo nulla aptior videbatur via, quam si in originem & causas dissensionis inquireretur.

XXI. Principium *cognoscendi*, de quo uno quæstio esse potest, ipsa statuitur natura, nimirum complete sumpta; & sic quidem ab hac thesi non magnopere dis-



sentiunt ii, qui in divinis perfectionibus principium collocant. Ex principio iuris, proprietates eiusdem manant.

XXII. Notio & regulæ de apparente collisione legum & officiorum, nempe ex ordine & gradibus finium.

XXIII. Hobbefiana Hypothesis de naturali iure. Eam velim expendant diligenter scrutatores iurium, & cum iis conferant argumentandi formulis, quibus hodierni Interpretes sacrorum iurium identidem utuntur.

XXIV. Pufendoriana socialitas non contemnendas de socialibus officiis animadversiones continet. Sed hoc quoque loco distingui debent ordines & gradus finium.

C. V.

In humanis actionibus non modo iura & obligationes, sed præterea adiuncta varia, & fines agentium spectari debent, ut habeatur actionum moralitas completa.


XXV. Notiones & principia hætenus indicata eo pertinent, ut de actione *in se*, sive ex objecto, ut aiunt, spectata, primo disquiri debeat, bona an mala sit. At constat vel ex theoretica Philosophia & Mechanica, quantopere a theoria abludat praxis. Id in re quoque morali usuvenit, in qua ad internam actionis bonitatem agentium fines & intentiones, ac præterea adiuncta varia accedunt. Condensavi hoc loco ea, quæ multis verbis diducuntur a scriptoribus moralium rerum. At vocabulorum multitudine nihil recte conficitur in disciplinis. Illud potius curandum, ut notiones abstractæ,
prin-

principiaque generalia singularium casuum proposita inductione clareant, & discentes assuefiant, abstracta ad concreta reducere, & in concretis intueri abstracta. Fit enim, ut homines in mundo & physico & morali versentur medii, quin ad phænomena, quæ perpetuo eveniunt, animum advertant.

XXVI. Circumstantiæ actionis.

XXVII. Finis non tam actionum, quam agentium. Exemplum extat §. CCCI.

XXVIII. Actio indifferens. *Indifferens* vel *adiaphorum* alio longe significato appellant dilucularii nostri. Quando enim de negotiis religionis, & pietatis exercitiis agunt, in numerum rerum *indifferentium* coniiciunt, quidquid ad sempiternam obtinendam salutem absolute necessarium haud est, etsi idem maxime pium sit, sanctumque, a divino ipso Servatore laudatum, a sanctissimis viris comprobatum, longo usu confirmatum, proindeque summe idoneum illi explendo Principis Apostolorum præcepto: *Fratres magis satagite, ut per bona opera certam vestram vocationem & electionem faciatis.* II. Petr. I. 10. Atque hæc adiaphora citra detrimentum imminui, tolli, immutari posse censent, non ecclesiastica tantum, sed profana etiam potestate, quæ negotia religionis cum fine civitatis conciliare obligetur. In idem cadit, atque eodem proposito excogitata est distinctio inter essentialia atque accidentalia negotia & iura Ecclesiæ. Conf. §. LXVIII. (e) Atque hi quidem, si de profanis, & caducis rebus, quæ non duræ necessitati duntaxat, sed commoditati quoque, & honestæ iucunditati accommodatæ sunt, similiter, ac de sacris sentiant, statuerentque; profecto iam glandibus vesci, &



equitare in arundine longa deberent. Conferant, quæso, sempiternæ salutis divinæque religionis gravissimum momentum cum inanitate caducarum commoditatum, atque de his tantundem detrahi sibi patiantur, quantum de illis decerpi, atque abradi cupiunt; tum vero haud longe aberunt ab exsequendo Apostolico monito: *Habentes alimenta, & quibus tegamur, his contenti simus.* — — *nihil enim intulimus in hunc mundum; haud dubium, quod nec auferre quidquam possumus; nam qui volunt divites fieri, incidunt in tentationem, & in laqueum diaboli, & desideria multa inutilia & nociva, quæ mergunt homines in interitum & perditionem.* 1. Tim. VI.

C. VI.

Posita moralitate completa actionum, præcipua earum affectio est imputabilitas.

XXIX. Doctrina de imputatione maxime propria est iurisprudentiæ. Quando enim leges generales ad speciem facti applicantur, videndum est sæpenumero, utrumne & quatenus actio imputari possit.

XXX. In quos actus cadat imputatio, in quos non cadat.

XXXI. Ex parte intellectus imputationi obstat ignorantia.

XXXII. Ex parte voluntatis imputatio poscit voluntarium; cuius multiplex & memorabilis partitio est. Notio quidem eius, quod *indirecte* voluntarium dicimus, satis frequentem usum habet. Negant, potestates binas, quæ supremæ sunt in suo genere, & independentes, qualis est sacra & profana potestas, alteram in alteram vel



vel indirecte quidquam posse. Et tamen secundum dilucularios plura potest civilis potestas circa res sacras; quare? propter nexum, inquit, quem Sacra cum profanis habent. Quid est hoc, nisi indirecte posse?

XXXIII. Coactio obest imputationi.

XXXIV. Anne metus quoque? qualis, quantusve?

C. VII.

Non modo suæ cuique actiones, sed aliorum etiam sæpe imputantur.

XXXV. Contingit non raro, ut in eandem actionem consentiant, vel conspirent plures; ac si homines adventitio societatis statu copulati sint, multo etiam citius & frequentius usuvenit, ut alterius actiones alteri adscribi possint, debeantque; generatim ergo & magnitudo & modus istius veluti influxus explicandus est, qui ab aliis in aliorum actiones fit.

XXXVI. Modus est multiplex, ac primo iussio & mandatum.

XXXVII. Dein consilium.

XXXVIII. Consensus.

XXXIX. Palpum.

XL. Receptus.

XLI. Participatio.

XLII. Hi quidem positivi erant modi: alii sunt negativi.



C. VIII.

In moralibus actionibus spectatur quantitas moralitatis earundem in se, & relate ad imputationem, atque ad agentem.

XLIII. Bonitas & malitia actionum, eique respondens laus, aut vituperatio, præmium aut supplicium, maiora esse vel minora, exaggerari aut elevari possunt. Inest ergo in moralitate actionum notio magnitudinis, seu quantitatis; cuius determinatio quoddam Matheseos genus est; quo examinari, ac definiri potest, 1. *pondus* ac momentum actionis in bonam, malamve partem: 2. *mensura*, ob quam commodum actionis, aut incommodum late patet, vel contra: 3. *numerus* actionum generis eiusdem. Casuum conscientiae explicatores, uti obligationum, ita & peccatorum velut mathesin quandam sibi propriam fecerunt. Hoc autem loco generales indicantur causæ, ex quibus moralitatis quantitas augeri, minuive potest.

XLIV. Ipsarum actionum aliæ aliis meliores sunt, aut peiores, specieque differunt.

XLV. In eadem specie insunt imputationis gradus.

XLVI. Pro adiunctis quoque variis crescit aut decrescit moralitatis & imputationis magnitudo.

XLVII. In factis, seu actionibus singularibus omnia, quæ antea enumerata sunt, una concurrunt.

C. IX.

Moralitas actionum & imputatio etiam maxime refertur ad conscientiam cuiusque.

XLVIII. Imputatio actionum non in foro tantum externo, sed interno quoque fit, cuius plurimam rationem habent sacri Canones. Famosa probabilissimi controversia longo iam tempore non argumentis solum, sed conviciis etiam & calumniis iactata, propriam sedem, quod mirabuntur nonnulli, in disciplina iuris naturalis habet; haud ægre tamen a prudente quovis Iurisconsulto Theologis ceditur; quamquam præscriptionum iura diversas inter disciplinas haud magis fortassis, ac inter diversas gentes obtinent.

XLIX. Poscit tamen instituti ratio, ut primo notiones conscientiae, variorumque dictaminum, quæ nominantur hoc loco, quantum necesse est, explicantur.

L. Dein affectiones conscientiae antecedentis, ut vocant, quarum mentio etiam in sacris fit Canonibus.

LI. Denique naturales & inconcussæ de illa conscientia obligationes.

LII. Ex quibus controversiæ indicatæ status enascitur.

LIII. Non prætermittendum aliud est conscientiae genus, quod *consequens* nuncupatur.



C. X.

Alia est humanarum actionum affectio, qua validè dicuntur, aut nulli.

LIV. De valore gestorum actuum dubitationes gravissimæ & frequentes lites, quæ in Iurisprudencia civili & canonica proveniunt multis locis, ad ius denique naturale devolvi debent, aliter exitum non habituræ. Unde generales notiones, principiaque necesse est stabilire, quæ, fateor, non nullo egent acumine, ut satis perspiciantur, apteque applicari queant. Generatim, si, valeatne actus, an nullus sit, quæritur; eius substantia, seu forma spectanda est, undecunque definita, ac vis nominis expendenda, quod modum complexum exprimit, ut Dialectici nuncupant.

LV. Dein ratio habenda iuris seu facultatis moralis, qua pollet, qui actum gessit.

LVI. Præterea consensus & voluntas agentis.

LVII. Denique id, quod *materiam* actionis dicimus, vel quod ab agentibus in pactum deductum est.

LVIII. Ex hisce principiis dirimitur controversia de valore actuum, qui vi, metusve causa gesti sunt.

LIX. Passim hodie generalis agitur quæstio de actionibus, quæ prohibitæ sunt, utrumne continuo pro pullis haberi debeant.



C. XI.

In numero naturalium officiorum ea primum sibi vindicant locum, quæ summum Deum, ac religionem proximæ attingunt.

LX. Uti iucundum est viro probo, illum investigare arctissimum nexum, quo natura omnes nos ac singulos cum divina atque æterna & perfectissima mente adstrinxit; ita idem facere diligentissime pernecessarium est. Sunt enim, quæ nostrorum est labes temporum, qui naturalia iura citra mentionem de summo Deo definiri a se posse non erubuerunt gloriari, perinde, imo etiam multo falsius, ac si quis familiæ, aut civitatis iura citra mentionem de familiæ aut civitatis capite explicare vellet. Sed hoc quidem modo penitus manca sit disciplina naturalis iuris, & infirma, quin perniciofa; manca quidem, utpote destituta summi momenti de colendo Deo naturalibus officiis; dein *infirma*; quia validissimis internæ obligationis disruptis vinculis, velut incisis nervis flaccescat necesse est; denique & *perniciofa*, quæ id demum efficiat, ut præcipuis actionum momentis a caduca petitis felicitate, non possint non depravari discentium animi. Quapropter, quæ iam §. II. indicata sunt vincula, quibus ab ipsa natura adstringimur supremo Numini, latius hoc explicanda loco sunt; ea triplicis esse generis diximus;

LXI. Nempe ex Creatoris idea provenientia.

LXII. Ex ratione Gubernatoris:

LXIII. Denique Finis ultimi rerum, maximeque hominis,



LXIV. Ex his officia theoretica erga summum Deum primo omnium profluunt.

LXV. Dein practica; non modo interna,

LXVI. Sed externa quoque. Ac cultus quidem externus supremi Numinis, quibus maxime actibus contineatur;

LXVII. Dein, quibus nitatur rationibus ex natura petitis, difficile demonstratu haud est.

LXVIII. Ex dictis notio religionis efflorescit, atque evolvitur.

LXIX. Deceptrices quoque de naturali religione ideæ expurgantur; transiturque ad revelatam;

LXX. Cuius & investigandæ,

LXXI. Et feligendæ.

LXXII. Et profitendæ gravissima naturæ obligatio patefit.

LXXIII. Appositus hic est secundum rationis dictata definiendæ Autonomiæ locus;

LXXIV. Eiusque ex iisdem principiis reprobandæ.

LXXV. Officiis religionis opposita respondent delicta.

LXXVI. Quomodo officia erga summum Deum, ad res, & loca, & personas eidem dicatas & consecratas sese exporrigant, indicandum hic potius, quam explicandum videbatur.



C. XII.

Officia hominis erga hominem numero, pondere & mensura respondent analysi naturæ complete sumtæ.

LXXVII. *Officiis erga summum Deum obeundis assuefactus, haud ita facile in iis delinquet, quæ sibi met a quovis, aut hominibus aliis sunt exhibenda. Nam illas etiam actiones, quæ nosmet, aliosve homines attingunt proxime, ad divinas referri perfectiones, ostensum est. In his igitur prima ratio suppetit, cur, quod sibi quisque, aut aliis debet, solerter præstet officium. Unde consequitur, ut officia religionis erga infinitum Numen non solum dignitate, sed etiam momento, atque ordine deductionis prima, præcipuaque censeri debeant. Errant sane, & enorme quantum a vero aberrant, qui neglecto divino cultu, & insuperhabitis exercitiis pietatis, caritatem, iustitiam, fidem, temperantiam hominibus ingenerari posse opinantur. Cum vero latissime pateant hominis in hominem officia, variique generis sint, recursum est ad analysin naturæ hominis, ex qua discere possumus, ad suas quamque doctrinam referre sedes, debitoque ordine collocare.*

LXXVIII. Vulgo quidem segregari solet eorum tractatio officiorum, quæ ipsi nobis, & quæ aliis præstare iubemur; sed ad perspicuendas rationes fundamentales, quas vocant, officiorum, perquam conducibile visum est, ut in unum locum restituerentur, quæ male distracta sunt. Nam & natura communis est omnium nostrum; proindeque eadem officiorum istiusmodi origo est. Dein siquid averſamur, quod in nos ab aliis
com-



committitur, ne quid tale aliis faciamus, nostri ipsorum amor nos docet, uti & siquid nostri gratia ab aliis fieri avemus, ut idemmet vicissim præstemus aliis, natura nos commonefacit.

LXXIX. Amor cuiusque in se, aliosque & principium est officiorum, & in numero eorundem; sed nempe disiungere oportet pravum, & rectum amorem.

LXXX. Ordo quoque istiusmodi officiorum præscriptus est a natura.

LXXXI. Unde primum est hominis in hominem officium de sempiterna, ut ita dicam, captanda beatitudine, & purganda, perficiendaque mente.

LXXXII. Proximum est de vitæ conservatione, & incolumitate.

LXXXIII. Ob quam causam naturali legi repugnant Autochiria, homicidium, abortus &c.


LXXXIV. Quoniam dein natura præceptis suis estimationi cuiusque, & famæ consulit, notiones eo pertinentes in primis explicandæ sunt.

LXXXV. Ex quibus confectaria profluunt non contemnenda.

LXXXVI. Expenditur ius tuendi famam & suam & alienam.

LXXXVII. Dein obligatio eius conservationis, quatenus pertineat.

LXXXVIII. Vix quidquam severis & immutabilibus naturæ aut potius summi Conditoris legibus indiget, ac linguæ usus, & facultas sermocinandi; cum, ut S. Iacobus inquit, *linguam nullus hominum domare potest, inquietum malum, plenum veneno mortifero*. Iac.



III. 8. Dubium non est, easdem leges ex gravi-
bus multo causis ad licentiam scriptitandi pertinere. Sed
dilucularii nostri respondere mihi videntur: *Labia nostra*
(calami nostri) *a nobis sunt; quis noster dominus est?*
Psalm. XI. 5.

LXXXIX. Naturalis est quædam arcani tenendi
obligatio.

XC. Nulla est, quam auctores quidam excogita-
runt, inter falsiloquium & mendacium differentia, spe-
ctando malum usum sermonis.

XCI. Neque ob id curiose cuivis interroganti con-
tinuo mens plane aperienda est. Usus æquivocationum,
ut vocant, sensibilibus, & stratagematum iisdem niti-
tur principiis & cautionibus.

C. XIII.

*Specialia officia hominis erga hominem determinat
tristis favor Necessitatis.*

XCII. Diversis partibus, quibus natura hominis com-
ponitur, diversis item, quibus gaudere potest, generi-
bus bonorum, totidem respondent genera miseriarum,
aut certe discriminum, quibus identidem homo subia-
cet; ac tum *necessitas* agendi quidquam aut omittendi
incidit, quod alio tempore non ageretur, nec omitte-
retur. Huic necessitati favores quidam a natura con-
cessi sunt; simul tamen per naturales cautum est leges,
ut servato finium ordine, & prætermisissis, aut etiam
abiectis vilioribus bonis, ea, quæ præstantiora sunt,
consecratur homo; dein nequa temere fingatur necessi-
tas; quod non infrequens est. Avaro homini perpetua
colli-



colligendi pecunias ante oculos obversatur necessitas; eo-
quod in proposito fine de comparandis vitæ subsidiis au-
reum mediocritatis gradum non videat, certe non teneat.
Denique naturæ præceptum est, ne iniquis viis necessita-
ti mederi quisquam curet. Hoc ergo loco generales
illæ animadversiones, quas principio fecimus, de or-
dine, ac gradibus finium, aptaque mediorum accom-
modatione præsentissimum usum habent, ac quo cre-
briores sunt necessitatis obtentus, eo magis res enu-
cleanda est.

XCIII. In primis qualitas necessitatis, eiusque va-
rii gradus indicantur; est enim alia communis seu vul-
garis, alia gravis, alia extrema.

XCIV. Natura favet necessitati, dum aliis similiter
non laborantibus obligationem opitulandi imponit; un-
de quæstio facti de præsentī necessitate eiusque gradu,
dein quæstio iuris de obligatione succurrendi exoritur.

CXV. Quo loco tria spectanda sunt: facultas suc-
currendi, modus, & necessitatis gradus.

XCVI. Ex quibus certæ regulæ defluunt.

XCVII. Et quoniam ius necessitatis est strictæ in-
terpretationis;

XCVIII. per illam, etsi extrema sit, communio bo-
norum reduci non videtur.

XCIX. Aliud est necessitatis genus, quo conserva-
tio vitæ nostræ cum vitæ alterius conservacione colli-
ditur, idque vel tristi casu, & citra hominum culpam;

C. Aut ex iniusta alterius aggressione.

CI. Quapropter de iustitia cruentæ defensionis di-
sceptandum est.

CII.



CII. Pro rerum autem & temporum varietate istiusmodi vitæ suæ defensio aliquando præcepta, universe concessa est; fieri potest, ut vetita censeretur debeat.

CIII. Eadem est disputatio de defendenda membrorum integritate, libertate, pudicitia.

CIV. Demum de iure fortunas suas defendendi non expedita quæstio est.

CV. Haud paulo aliter de famæ defensione est differendum; quo loco manifestis iterum exemplis palam fit, quam pessime abuti soleant homines illo versabili dicto: Ius ad finem dat ius ad media.

CVI. Proprius hic est de duelli moralitate disputandi locus. Exponitur eius notio, & genus multiplex.

CVII. Cum universe præter ordines, gradusque finium, mediorum quoque sit considerata ratio, iure quæritur, aptane honoris tuendi aut reparandi via censeretur duellum possit.


CVIII. Cum autem nequaquam possit; concluditur naturali iuri id repugnare.

C. XIV.

Uti pleraque hominum negotia, sic & plurima officia versantur circa res externas ad vitæ humanæ necessitatem, commoditatem, honestam iucunditatem necessarias.

CIX. Indaganti origines eorum iurium, quæ in externis rebus ad vitæ humanæ usum conditis a natura attributa nobis sunt, redeundum est ad primævum earum statum, qui alius non erat, nisi communio rerum negativa.

CX. Inde



CX. Inde recte philosophatur quisque de recessu hominum ab ea communione; iustusne fuerit, & approbatus naturali iure, aut plane præscriptus. Indicanda vero & tollenda est hoc loco ea ambiguitas sermonis, aut falsa opinio, qua naturali obligationi adscribitur, si quod unicum est non natura, sed temporum ratione remedium, quo naturali obligationi satisfiat. Similis se offeret controversia §. CXCIV. de origine civilis status.

CXI. His præmissis disquisitionibus notio Dominiæ exponitur.

CXII. Eiusque consecutaria enumerantur.

CXIII. Dominium acquirendi modus duplex, primigenius aut derivativus.

CXIV. Primigenius est occupatio.

CXV. Et accessio.

CXVI. Cum hisce modis sublata sit communio rerum; nullæne eius reliquæ superstites sint, interrogatur.

CXVII. Aut iura ex primæva communione residua.

CXVIII. Inde ordo ducit ad indicandos modos acquirendi derivativos.

CXIX. In horum numero utrum testamenta sint recensenda, quæritur.

CXX. Quæ vim habent, non tamen a natura.

CXXI. Difficilior est decisio de successione ab intestato inter parentes & liberos;

CXXII. Inter quos ipsa videtur natura bonorum communionem constituisse.

CXXIII. Præter verum dominium, de quo hætenus actum, aliud eius genus, quod interimisticum vocant, est admittendum. Eius fundamentum situm est
in



in rerum humanarum instabilitate, & iusta hominum ignorantia.

CXXIV. Ex principiis naturæ dirimi potest celebris controversia de fructibus virtualiter extantibus a possessore bonæ fidei restituendis.

CXXV. Longe aliter de possessore malæ fidei ius naturæ decedit.


CXXVI. Denique Usucapio, utrumne naturalis an positivi iuris creatura sit, quæritur, hoc est, utrum natura, an legibus arbitrariis ad modos acquirendi referri debeat.

CXXVII. Explicatis dominii & possessionis iuribus delicta iisdem maxime opposita innotescunt.

C. XV.

*Iura & obligationes ex pactis & contractibus
provenientes.*

CXXVIII. Pacta & contractus ad modos acquirendi derivativos pertinere, non videtur in dubium posse revocari; etsi contingat aliquando, ut ex iis iura proveniant, quæ antea non extiterant, ut sit constituto primum jure pignoris, aut imposita fundo servitute. Placet Grotii sententia, asserentis, ius illud, quod in alterum transfertur ope pacti, virtute quadam penes transferentem antea extitisse. At Pufendorfius totum istud dubium explodit de I. N. & G. L. VII. C. III. n. 4. ubi ita differit: „Valde puerile est credere, in rebus moralibus, quando ius quodpiam, aut quævis qualitas moralis in alterum collata dicitur, necessum esse, ut eadem prius alicubi separata existat; quin potius iura & alias qualita-



tes morales mutua voluntatum conspiratione per pacta resultare, in aprico est." Similis disputandi subtilitas in controversia hæret, qua origo maiestatis civilis indagatur. conf. §. CCIV. In proposito igitur argumento notio pacti primum exhibetur.

CXXIX. Substantialia pacti ex iure paciscendi, consensu paciscentium, & materia pacti pendent; quæ expendenda sunt ob eam causam, quod in quavis contractuum classe ac specie insit ratio generica pacti, eiusque substantialium.

CXXX. Formam pacti efficit conditio,

CXXXI. Dies pacto adiectus:

CXXXII. Modus, arrha, causa, demonstratio, dis-iunctio.


CXXXIII. Effectus pacti est obligatio, ac ius productum; ubi generatim de servanda pactionis fide agitur.

CXXXIV. Ab hisce generalibus ad classes contractuum descenditur.

CXXXV. Et species ac quasi familiæ contractuum continua differentiarum serie enumerantur.

CXXXVI. In specificis contractuum determinationibus insunt substantialia, naturalia, accidentalia.

CXXXVII. Hisce expositis demum ostenditur, quomodo leges pactorum & contractuum ad datum negotium applicentur ope duplicis ratiocinii.



C. XVI.

Ex neglectu officiorum, de quibus hætenus tractatum est, frequens oritur obligatio restituendi, quod debetur; eaque peculiarem expositionem poscit.

CXXXVIII. Quæ de restitutione creberrimo usui est doctrina, iure naturali tota nititur. Primæ ejus notiones adumbratæ sunt, cum de iure indemnitate §. XV. (g), deque iuribus perfectis, eorumque læsione §. XVII. (d. e. f.) ageretur. Accuratio rerum ad eam pertinentium expositio, deductioque uno videbatur cumulo congerenda; quoniam tractatio ipsa & ampla est, & principiorum nexum, ac iurium analogiam exhibere debet. Primo igitur, quid inter restitutionem & satisfactionem intersit, quæ confunduntur sæpenumero, indicandum est.

CXXXIX. Dein obligatio restitutionis quas habeat origines, aut rationes sufficientes, quæ *radicum* nomine veniunt, inquirendum. Vulgo radix restitutionis statuitur duplex: primo res accepta.

CXL. Dein injusta acceptio. At nempe injusta esse potest tum in se spectata actio, etsi animo non malo edita sit; dein quod pravus etiam nocendi animus præsto fuerit. Unde

CXLI. Novæ de dolo, culpa, casu fortuito quæstiones prodeunt.

CXLII. Constituitur primo ea, quæ minime ambigua est, obligatio restituendi ex iniusta acceptance proveniens.

CXLIII. Inde ad ambiguas obscurasque controversias fit progressio, & excutitur vulgata apud Scripto-



res thesis: *Nemo (secluso contractu) tenetur ad restitutionem damni a se illati, nisi in eo inferendo culpam admitterit Theologicam contra iustitiam.*

CXLIV. Eorum, quæ disputata sunt, applicatio fit ad casum, quo quadrupes pauperiem fecisse dicatur; ad actiones præterea noxales.

CXLV. Sunt vero nonnullæ aliæ quæstiones de damno dato, quas distinguere & segregari necesse est.

CXLVI. Præter rem acceptam, & iniustam acceptionem tertia est radix restitutionis contractus, cuius aliquando primaria, aliquando accessoria est obligatio restituendi.

CXLVII. Ex conflictu conservandi eodem tempore res nostras & alienas nova provenit disputatio.

CXLVIII. Quæ in contractibus in esse debeat æqualitas.

CXLIX. Quarta radix restitutionis in quasi contractibus hæere dicitur.

CL. Quia datum damnum, uti actio, qua infertur, pluribus sæpe imputari potest, nova emergit lis, si a pluribus datum sit damnum, quis præ ceteris adstringatur ad illud reparandum.

CLI. Ex consilio nocendi dato, quæ proveniat obligatio restituendi.

CLII. Ex consensu plurium:

CLIII. Ex palpo, & dato recursum.


CLIV. Ex participatione.

CLV. Ex negativis imputationum modis.

CLVI. Non semper expeditum est decidere, *quid, quantumve* restitui oporteat.

CLVII. Quo tempore;

CLVXIII.



CLVIII. Quo loco? cuius cura & sumtibus?

CLIX. Cui facienda sit restitutio?

CLX. Regulæ ordinis, quas natura præscribit pro concursu creditorum.


CLXI. Cum obligatio restituendi sit in numero positivarum obligationum, quæ facultatem, tempus, opportunitatem poscunt, discentiendum restat, quæ sit iusta causa differendi restitutionem aut omittendi, idque ex capite triplici:

CLXII. *Primo*, quando id, quod ereptum est, natura sua reparari non potest:

CLXIII. Aut res illa, quæ debebat restitui, interiit.

CLXIV. *Secundo*, si debitor omnino eget, nec par est solvendo aut restituendo.

CLXV. *Tertio*, si creditor recuperata re sua male usus est: si inveniri non potest, quæque sunt istiusmodi.



INSTITUTIONUM IURIS NATURÆ

LIBER II.

IUS NATURÆ SOCIALE.

C. I.

Notiones Societatis & iuris socialis.

Si recta institutionis ratio, legesque methodi a simplicibus principiis ad composita, atque a generibus rerum ad varias earum formas, speciesque iubent pro-



gredi, necesse est, ut iis expositis iuribus, quæ absoluto naturæ statui adhærent, aut certe hypotheticæ naturam societatis haudquaquam desiderant, deinceps ad hasce ipsas societates, earumque generales notiones descendatur; ac tum quoque a simplicibus inchoandum est status socialis notionibus, & principiis eius generalibus. Est ergo naturalis Iurisprudentiæ pars quædam de iure sociali inscripta, cui, quæ minorum societatum propria sunt, adiunximus ad majores paulatim societates, ipsamque maximam, nimirum civilem progressuri. Illius partis hæc est angusta, rudisque adumbratio.

CLXVI. Confociationum particularium ratio exponitur, propositi fines, virium unio: personæ moralis inde existentis idea, societatis interna constitutio & politia, negotiorum socialium indoles.

CLXVII. Societatum differentiæ, progressiones, compositiones.

CLXVIII. Aliæ æquales sunt, aliæ inæquales.

CLXIX. In collegiis seu æqualibus societatibus ratio suffragiorum in primis spectanda est.

CLXX. Comparatio æqualis & inæqualis societatis utriusque notionem & naturam perspicuam facit.

CLXXI. Societatis inæqualis potestas & imperium maxime proprium est.

C. II.

Societas coniugalis.

CLXXII. Prima, quam natura spectabat, societas est coniugalis, aliarumque velut origo, ac seminarium. Exponitur ergo finis, ac notio matrimonii.

CLXXIV.



CLXXIII. Eius necessitas aucto humano genere Universos afficit, non singulos.

CLXXIV. Sitne vi naturæ ea societas indissolubilis, quæritur :

CLXXV. Item æqualis per se, an inæqualis?

CLXXVI. Polygamix notio, ac moralitas.

CLXXVII. Etsi vero a natura hæc fit instituta societas, tamen pactitia est, & in numero contractuum veri nominis.

CLXXVIII. Unde, quæ pactis substantialia sunt, ea contineat, necesse est; hinc oritur idea impedimentorum natura dirimentium.

CLXXIX. In his impedimentis quatenus consanguinitas & affinitas censerī debeat, indagatur.

CLXXX. Fini ac naturæ societatis coniugalis coniugum iura & obligationes respondent.

CLXXXI. Aptus hic maxime videbatur locus, delicta carnis naturali legi repugnantia enumerandi.

CLXXXII. Quid sponsalium proprium sit vi naturæ, cum sint quodammodo via ad matrimonium, traditur.

C. III.

Societas Parentalis.

CLXXXIII. Indolem huius societatis patefaciunt nativa imbecillitas humani foetus, pactum coniugum, stimuli naturæ.

CLXXXIV. Origo ac fundamentum potestatis parentalis investigatur.



CLXXXV. Eiusque potestatis velut mensura & obiectum.

CLXXXVI. Uti omnis potestas, sic parentalis quoque inspectoria est, rectoria, executoria.

CLXXXVII. Hisce respondent mutua liberorum in parentes officia.

C. IV.

Societas herilis.

CLXXXVIII. Ex origine servitutis, quæ non una est,

CLXXXIX. Eiusque modo, ac veluti quantitate

CXV. Notio huius societatis, quantum satis esse videbatur, describitur.

C. V.

Societas composita familiæ.

CXCI. Ex societatibus simplicibus, coniugali, parentali ac herili una coniunctis, societas oritur composita familiæ. Si earundem simplicium binæ quævis combinentur, tres aliæ minores proveniunt.

CXCII. Ea Combinatio fines simplicium societatum non tollit; cum tamen domestica societas instar unius & a simplicibus distinctæ societatis cogitanda sit, ea peculiari etiam fine gaudet, qui in usu vitæ quotidianæ finibus simplicium societatum accommodato consistit. Unde iura & obligationes familiarium dimanant.

INSTITUTIONUM
IURIS NATURÆ
LIBER III.

IUS NATURÆ PUBLICUM.

Hanc Iurisprudentiæ naturalis partem eo curatius scrutatur sacrorum iurium Candidatus, quo frequentius ad eam, fidentiusque provocari intelligit a scriptoribus quibusdam novis: quasi thesauros complecteretur toti retro antiquitati absconditos, quos nec Evangelii sacrosancti libri, nec traditionum depositum, nec Patrum volumina, nec Conciliorum acta, nec Pontificum Bullaria subministrant; quantumvis iidem ad genuinam sacrorum iurium interpretationem, decisionemque ita necessarii sint, ut nihil supra. Quapropter necesse est, ut a capite ius istuc civitatis arcessatur, & cuiusmodi sit, quos habeat propositos fines, quæque iura iisdem consentanea & requirat, & reipsa teneat.

C. I.

Origo, notio, Proprietates civitatis.

CXCIII. Quemadmodum res humanæ omnes a tenuibus initiis proficiscuntur, neque per saltum assequuntur perfectionem suam; ita non sine continua progressionem a minoribus societatibus ad maiores, nempe anarchicam & civilem ventum est.



CXCIV. Neque tamen civilis status iuri præceptivo naturæ adscribi potest. Conf. §. CX.

CXCV. Quod vel ipsa indicat opinionum varietas de origine Civitatum & Imperiorum.

CXCVI. Cum valde composita sit civilis societas, ad eius pervidendam naturam, uti in omni fit composito, recte materia eius spectatur, forma, causa efficiens, ac finis.

CXCVII. Ex quibus dein proprietates eius status eluceſeunt.

C. II.

Imperium civile, eiusque ſubiectum; ex quo forma civitatis pendet.

CXCVIII. **E**ſſentiale huic ſtatui imperium eſt, poteſtas, ac Maieſtas civilis.

CXCIX. Cum imperium non poſſit non ineſſe in quodam ſubiecto, ex iſtius determinatione forma civitatis pendet. Notiones hic incidentes in iure ſacro uſum habent non contemnendum; poſtquam de forma ſtatus eccleſiaſtici inde ab aliquot ſeculis diſceptari cœptum eſt. Numerum formarum, quas *mixtas* vocant, leges permutationum algebræ exhibent.

CC. De ſimplicibus imperii formis ſua cuiusque commoda, incommoda, morbi recensentur.

CCI. De ſtatu primum Democratico,

CCII. Dein Ariſtocratico:

CCIII. Demum & Monarchico.

CCIV. De origine civilis imperii ſeu maieſtatis, utrum a Deo proxime conferatur, an ex populi conven-

ventionem tanquam canali in Monarchiam decurrat, maiore fortassis contentione, partiumque studio, quam acuratione aut fructu nonnulli disputant.

CCV. Dignæ sunt, quæ expendantur, proprietates civilis imperii.

CCVI. Nec accidentariæ determinationes sunt præmittendæ; quæ ex aliis longe causis pendent, non ex natura iurium vel negotiorum civilium. Aliter certe dilucularii nostri essentialia & accidentalia definiunt, cum de sacra tractant potestate, neque omnino analogiam cum civili habent præ oculis.

C. III.

Modus acquirendi civile imperium & amittendi.

CCVII. Si in disciplinis figendæ sunt notiones, fixæque constanter retinendæ, nullus est *originarius* civile imperium acquirendi modus, secundum notionem, quam fiximus §. CXIII. (a). Conf. dicta paulo ante §. CXXVIII.

CCVIII. Proprietates civitatis electivæ.

CCIX. Successivæ.

CCX. Imperium civile amittitur intereunte civitate, aut ea incolumi manente.

C. IV.

Imperio & statui civili respondent obligationes & iura subditorum.

CCXI. Quæ singulis civibus ex notione ac fine, id est, natura civitatis proveniunt iura & obligationes, quodammodo *publica* cenferi possunt;

CCXII.



CCXII. Ea autem referuntur vel ad summum Imperantem, vel ad totam communitatem, vel ad singulos cives alios.

CCXIII. Obligationes civiles erga Imperantem:

CCXIV. Erga communitatem.

CCXV. Erga cives alios singulos.

CCXVI. Subiectio civilis variis modis & oritur, & cessat.

C. V.

Iura & obligationes Imperantis ac subditorum proxime sese exerunt circa securitatem internam & externam civium, & civitatis.

CCXVII. Ad finem civitatis & vim imperii civilis distincte concipiendam, atque a rebus sacris segregandam nihil æque conducibile, quam expendere obiecta illa, quæ attinguntur civili imperio. In his præcipua est Politia: securitas interna, & externa, quæque ad hanc referuntur.


CCXVIII. Quid securitati internæ obfit.

CCXIX. Recensentur insignes articuli politiæ.

CCXX. Alii,

CCXXI. aliique.

CCXXII. De externa securitate. Quam amplius est campus, in quem civile imperium excurrat, salvis sacrosanctis iuribus!



C. VI.

Multiplex inter res civiles & ecclesiasticas differentia. Sunt tamen momenta gravissima, itemque media, ac iusti modi, quibus potestas civilis attingit negotia Religionis.

CCXXIII. Non leviter percurrenda, sed animo penitus imprimenda est differentia utriusque potestatis, sacræ nimirum & profanæ, fixoque obtutu spectanda utriusque origo, finis, media, negotia. Unde utramque summam esse, neutram ab altera pendere, tam perspicuum fit, ut nihil magis.

CCXXIV. Interest ad cognoscendas veritates momenti maximi, ut idea, quam de felicitate caduca homines sibi effingunt, examinetur, ventiletur, purgetur. In quem finem effata sacri codicis ipsa ratione & experientia confirmata insignem usum præstant;

CCXXV. Felicitas præsentis status cum detrimento religionis, divinique cultus exaggerari a multis solet.

CCXXVI. Ob differentiam ac segregationem utriusque potestatis res divinæ ab Imperante negligendæ haud sunt; cum multis adstringatur titulis, ob quos eas cordi curæque habeat. Explicantur ii tituli.

CCXXVII. Specialia Imperantium circa res divinas officia ad Ius Ecclesiasticum remittuntur. Explicata enim institutione divina Ecclesiæ, haud magno labore opus est ad eas confutandas hypotheses, quas Novatores quidam ad potestatem Ecclesiæ atque ordinis hierarchici methodice eludendam ac subvertendam confinxerunt.



C. VII.

Securitas interna & externa civitatis conservari non potest sine sumtibus; quos subditi, quantum opus est, contribuunt in usus publicos.

CCXXVIII. Ponderandæ inprimis causæ & fines expensarum publicarum. De bonorum temporalium diversitate, quæ inde oritur, indicaturque hoc loco, confer deinceps §. CCLXXXIV. (e) & §. CCCXCVII. (c)

CCXXIX. Proximum est, ut fontes indicentur, ex quibus sumtus hauriendi sunt.

CCXXX. Ius Imperantis exigendi tributa fundatur in natura status civilis.

CCXXXI. Imperantes constituunt præfectos ærario publico: natura & ærario, & ærario præfectis apponit leges suas, tanquam custodes.

CCXXXII. Subditi partem patrimonii sui in ærarium publicum inferunt, ut reliqua pars securitatem obtineat. Hinc obtentu publicæ securitatis securitas privata in discrimen adducenda non est.

C. VIII.

Aliud medium, quod obtinendo fini civitatis necessarium est, consistit in consiliis & ministeriis officialium eiusdem.

CCXXXIII. Notio muneris privati & publici. Necessitas Consiliariorum, & Ministrorum.

CCXXXIV. Ius eos deligendi penes Imperantem est: obligatio parendi penes subditos ob unionem virium.

CCXXXV.



CCXXXV. Dignitates civiles ex civili imperio tanquam fonte dimanant;

CCXXXVI. Sic tamen, ut eæ naturæ ductu in digniores deriventur.

CCXXXVII. Expenduntur diversæ viæ pervenienti ad dignitates & munera civitatis.

CCXXXVIII. Nec dimissio officialium a muneribus publicis difficultate vacat, aut cautionibus a natura præscriptis.

CCXXXIX. Obligationes officialium positivæ & negativæ respondent naturæ & indoli officiorum.

C. IX.

Securitatis & tranquillitatis obtinendæ, conservandæ ac restituendæ nullum præsentius, magisque necessarium remedium est, quam administratio iustitiæ.

CCXL. Potestas iudiciaria perquam necessaria est in statu civili; ea profluit ex civili imperio; ut adeo Imperans omnis iurisdictionis fons censi queat.

CCXLI. A iurisdictione procedit iudicium, cui non modo finem, sed etiam ordinem quemdam natura præfixit,

CCXLII. Suasque partes & actori & reo designavit;

CCXLIII. Nec vero advocatos suæ cupiditati & tumultui reliquit.

CCXLIV. Præcipuas vero partes iudicibus imposuit.

CCXLV. A quibus lis decidenda est secundum veritatem & merita causæ.

CCXLVI.



CCXLVI. Si pars læsa, quæ sanari debuit, vulnere-
retur a iudice, natura offert remedia curandæ pla-
gæ idonea.

CCXLVII. Iustitium quid & quotuplex sit.

CCXLVIII. Ad iurisdictionem criminalem rite per-
spiciendam in primis notio pœnæ exponitur.

CCXLIX. Qui ius habet infligendi pœnam, eius
subiectum activum dicitur.

CCL. Delinquens *subiectum passivum* est. Utrique
subiecto sua iura & obligationes inhærent.

CCLI. Ad notionem pœnæ, eiusque subiecti acti-
vi & passivi adiungenda est notio delicti:

CCLII. Proportio pœnam inter ac delictum:

CCLIII. Pœnarumque varia indoles;

CCLIV. Ex quibus præcipua iurisdictionis crimi-
nalis capita determinantur.

C. X.

*Per potestatem legislativam non modo fini civitatis
immediate consulitur, sed etiam omnia media eidem
fini consentanea in usum deducuntur; ut adeo po-
testas legislativa velut anima corporis civilis, ac le-
ges, ceu totidem operationes eiusdem animæ
spectari debeant.*

CCLV. Si medicamentis comparantur leges, per quas
arcentur morbi, vel curantur, earum tractatio recte ad
calcem reiicitur iurisprudentiæ publicæ; quia interna
corporis civilis constitutio, eiusdemque operationes at-
que etiam morbi ante noscendi sunt, quam empyrico-
rum more nulla præmissa theoria ad medicamentorum
noti-



notitiam procedatur. Prima igitur se offert notio legis, eiusdemque ab actibus analogis differentia.

CCLVI. Dein finis & materia legum dispicitur:

CCLVII. Ea materia sunt actiones, quas aliter atque aliter lex attingit.

CCLVIII. Singularem mentionem illud desiderat legum genus, quod in præsumptione periculi fundari dicitur.

CCLIX. Difficile non est ex dictis concludere, quid sub legem non cadat.

CCLX. Subiectum activum legis est Imperans.


CCLXI. Forma legis in promulgatione sita est.

CCLXII. Eiusdem efficientia vero in obligatione;

CCLXIII. quæ conscientiam & forum internum afficit.

CCLXIV. Qui legi servandæ subiacent, subiectum passivum nuncupantur;

CCLXV. Quale censetur ipsum etiam territorium Imperantis. Ad hæc capita diversæ de legibus quæstiones & controversiæ referuntur.



INSTITUTIONUM
IURIS NATURÆ
LIBER IV.

IUS NATURALE GENTIUM.

C. I.

Notio gentis, & Iuris gentium, eiusdemque principia.

CCLXVI. **P**rima est, cum de multitudine vel turba hominum, aut familiarum agitur, quaestio definitiva, utrum *gentis* nomine vere comprehendatur. Secus enim humanitatis ea quidem & privatorum, non autem gentium iure gaudet. Similis est quaestio, cum secta hominum ex quadam religionis formula viventium Ecclesiam Christi se nominat.

CCLXVII. Est quædam inter phyficas personas, & morales similitudo; tamen negotia sunt quædam gentium propria, non item singulorum. Unde ob ipsam negotiorum naturam, gentiumque notionem speciatim tractanda veniunt ea, quæ a privatis ad publicas personas traducuntur, naturæ iura. Idcirco acute dispendendum est, quid ratio multitudinis civili nexu colligatæ ad privatorum iura & officia addat, vel de illis detrahat. Sunt quædam in omni statu plane eadem, & immutabilia; cuiusmodi sunt, quæ de finibus, eorumque ordine, gradibus, aptisque illos confectandi rationibus sunt constituta. Universi non minus subsunt providen-

videntiæ supremi Dei, ac singuli; utrinque necesse est, ut prima ratio & summus religionis sit favor: neque enim posito civili statu minus adstringimur Deo, ac in statu primigenio. Et quemadmodum privatorum negotia, aut officia minorum societatum obesse non debent officiis religionis; sic neque probari possunt illæ civitatis leges, aut ea politia, quæ religioni ac sempiternæ civium salutis officiant.

CCLXVIII. Personæ morales mutuis iuribus & obligationibus afficiuntur salva libertate & independentia. Ex quo ius gentium naturale, idemque universale oritur.

C. II.

Officia absoluta gentium perfecta & imperfecta.

CCLXIX. Officia absoluta gentium perfecta sunt vel imperfecta; atque hæc vel noxiæ utilitatis, vel innoxie, eaque ipsa activa, aut passiva. Utrumne innoxie sint utilitatis, penes gentem est definire, quæ præstare debet illa officia.

CCLXX. Primum se offert ius æqualitatis gentium, eiusque consecraria. Civitate disiunctas gentes iungit Ecclesiæ unitas; quæ memorabile inter politicum & Ecclesiasticum statum discrimen inducit.

CCLXXI. Ex æqualitate gentium libertas earundem & independentia profluit.

CCLXXII. Inter gentes, tanquam morales personas conservatio individui & membrorum cogitari potest. Et quoniam iura & media conservationis tam arcte definiri nequeunt, ut soli necessitati serviant; idcirco



perfectio nihil videtur esse, nisi latior quidam conserva-
tionis gradus.

CCLXXIII. Ad conservationem & perfectionem
pertinet sufficiens copia rerum, quæ appositæ ad vitam
humanam sunt.

CCLXXIV. Eodem pertinent commercia inter
gentes,

CCLXXV. eorumque libertas.

CCLXXVI. Existimatio, gloria, fides maxime in
personas etiam morales cadunt.

CCLXXVII. Uti & officia quæ perfectionem men-
tis, & sacrosanctam religionem attingunt.

CCLXXVIII. Ex cultu imperfectorum officiorum
mutua gentium benevolentia efflorescit. Secus ius re-
torsionis habet locum.

C. III.

*Iura & officia gentium circa Dominium & pro-
prietatem rerum.*

CCLXXIX. Quidquid in iure privato de connato singu-
lis occupandi iure, deque ipsa occupatione: quidquid
de dominio rerum proveniente ex facto occupationis
& occupandi iure tanquam iustissimo titulo: quidquid
de consecrariis domini & acquirendi modis derivativis
demonstratum est, totum id, quatenus ex iure profluit
naturali, ad gentes est transferendum, quæ iisdem iu-
ribus non modo utuntur, sed eminentiore etiam ratio-
ne utuntur; quia singulorum iura & vires in civili im-
perio colliguntur, corroborantur, efficaciora fiunt.

CCLXXX. Ad occupationem opus non est consen-
su aliarum gentium: non occupatur, nisi res nullius:
quod-

quodque eiusmodi est, ut sit exhausti usus, utque in potestatem redigi & viribus physicis teneri possit.

CCLXXXI. Non inelegans hic enascitur quæstio de dominio maris, utrumne illud,

CCLXXXII. Et quatenus clausum sit,

CCLXXXIII. Aut liberum.

CCLXXXIV. Ad consecratoria domini inter gentes referendum est ius territorii. Inde diversa bonorum temporalium denominatio & partitio intelligitur; de qua supra facta est mentio.

CCLXXXV. Alia domini consecratoria recensentur. Leges Romanæ, quæ ad transferendum modis derivativis dominium, ut res tradatur, exigunt, a simplicitate naturalis iuris recedunt.

CCLXXXVI. Præscriptionis vis ad transferendum dominium, utrum a natura sit, an secus; in negotiis gentium citius cernitur. Fit sæpe, ut naturali iuri tribuantur a Scriptoribus ea, quæ qualemcunque præ se ferunt æquitatem, & ob id legibus positivis constitui solent. ac VV. Icti Romani nomina naturalis ac gentium iuris fere miscuerunt, quorum notiones hodie evolvuntur, segregantur, accuratius figuntur. Siqua lex determinat media, quæ per naturam determinata non sunt, etsi per naturam sint conducibilia ad propositos fines, ea non continuo pro naturali lege habenda est. Ac si præscriptio apud plerasque etiam gentes vim habet, quemadmodum & consuetudinum auctoritas, non protinus ipsas inter se gentes ea afficit & confringit.

CCLXXXVII. Etsi præscriptio vim a natura non habeat; dubium tamen non est, quin divina sapientia



de remedio iuris providerit, quo iura summorum Principum firmentur, & siquod in prima regni acquisitione irrepsit vitium, id progressu quodam temporis sanetur.

C. IV.

Iura & officia hypothetica gentium orta ex pactis, & fœderibus.

CCLXXXVIII. Generalia de pactis privatorum principia applicanda sunt ad gentes.

CCLXXXIX. Ius paciscendi gentibus competit. An Christianis cum infidelibus?


CCXC. De valore pactorum inter gentes, & exceptione metus non rara est, nec levis controversia. Ex notione gentis, & natura mediorum, quibus utitur ad sui conservationem, aliter fere de gentibus, ac privatis est disserendum.

CCXCI. Materia pacti nec moraliter nec physice impossibilis evadat, necesse est. Pacta etiam inæqualia robur habent.

CCXCII. Pactorum ac fœderum inter gentes varia est partitio.

CCXCIII. *Sanctum* dicimus in disciplina naturalis iuris, quod ut immune penitus ab omni violatione sit, communis salus postulat. Sancta igitur inter gentes fœderum & pactorum fides est; tum quod non inean-
tur, nisi de rebus summi momenti, tum quod sine gravissimis multorum incommodis violari non possint. Huc pertinet notio de existente *casu fœderis*.

CCXCIV. Pactiones accessorix inter gentes quoque locum habent, ac nonnullæ quidem unice propriæ gentium, ceu guarantia, obstagium.



C. V.

Iura Belli gentium proprii.

CCXCV. Notio belli primum ventilatur; rectene in statu per vim certantium collocetur, ut aliud privatum sit, aliud publicum, utrumque iustum, vel iniustum.

CCXCVI. Magna inter cruentam privatorum defensionem, & gentium bella analogia est. Ius ad finem dat ius ad media non quæcunque; nam leniora præferenda sunt; dein iura necessitatis sunt strictæ interpretationis. Demum inter ius, & prudentiæ regulas distinguere necesse est. Nam *quis rex iturus committere bellum adversus alium regem, non sedens prius cogitat, si possit cum decem millibus occurrere ei, qui cum viginti millibus venit ad se? Alioquin adhuc illo longe agente, legationem mittens, rogat ea, quæ pacis sunt.* Luc. XIV. 31. 32.

CCXCVII. Ius belli sublatum non est lege divina positiva. Differt autem a recto usu iuris.

CCXCVIII. Deductio eius iuris ex principiis naturæ palam facit, esse bellum reparativum, defensivum, asscuratorium.

CCXCIX. Nullum autem punitivum.

CCC. Appositus hic est locus, insignia corollaria maximique usus deducendi de nexu, & cavendi iure.

CCCI. Alia est disquisitio de modo ac forma belli, ceu de genere armorum, de iure in personas, & res hostium.



CCCII. Considerandæ etiam sunt gentes belli sociæ, auxiliatrices, neutrales. Nempe alia est causa principalis, alia accessoria. Conf. §. XXXV.

C. VI.

Iura victoriæ, pactorum bellicorum, & pacis.

CCCIII. Victoria universalis est, aut particularis: sola non efficit, nec demonstrat ius.

CCCIV. Si titulus acquirendi subest, iura victoriæ attingunt hostium personas, res, iura publica civitatis. Idea iuris postliminii.

CCCV. Fides data etiam hostibus servanda est; cum ea obligatio ex natura humana profluat, quæ statu hostili non tollitur. Id pertinet ad inducias bellicas & pacificas, id est, armistitium, ad literas commeatus, pacta deditionis, seu capitulationes.

CCCVI. Ab his demum venit ad pacem, seu pacificationem; in qua insunt alia communia omnium pactorum: alia propria soli pacificationi, quæ vim transactionis habet: stabilitatem poscit: Amnestiam continet: & inter personas liberas, nulli subiectas communi iudici, concluditur.

CCCVII. Illud commune pactorum, ut primo quæ-
ratur de iure concludendi pacem:

CCCVIII. Dein de consensu:

CCCIX. Denique de materia, sive iis, quæ pacificatione comprehenduntur.

CCCX. Unde intelligitur eius effectus; qui firmari potest pactis adiectitiis, e. g. guarantia. Contraria est ruptura pacis.

C. VII.



C. VII.

Ius legationum inter gentes.


CCCXI. Uti status naturalis & originarius singulorum hominum societatem aliorum non excludit : ita nec status liber & naturalis gentium. Ea societas refertur ad communicationem rerum & operarum : quæ aliquando iuris perfecti, creberrime imperfecti : nonnunquam solius decori rationem habet. Porro communicatio ista sine tractatu non fit, nec fere tractatus sine legatis.

CCCXII. Inde patet necessitas, & legati notio, quæ arctior est, quam notio procuratoris tantum, aut solius officialis. Ex quo Character repræsentatitius elucet. Alii a legatis sunt *agentes, deputati, commissarii.*

CCCXIII. Ius legationum a natura tributum est gentibus. Reiectio legatorum aliquando iuri perfecto gentium, fere imperfecto, non raro soli decoro repugnat.

CCCXIV. Legatorum sanctitas.

CCCXV. Eorum libertas & exemptio a potestate gentis, ad quam missi sunt.



INSTITUTIONUM

LIBER V.

IUS ECCLESIASTICUM PUBLICUM.

C. I.

Ecclesia Christi inde ab origine sua est una, sancta, catholica, & apostolica.


CCCXVI. **Q**uæcumque sit definitio *nominalis* Ecclesiæ; rei ipsius definitio *arbitraria* non est. Eo nomine sæpe veniunt cætus orthodoxi solum *particulares*: aliquando Hierarchæ, qui Ecclesiam repræsentant, uti Imperans civitatem. Maxime vero ea denotatur Ecclesia, de qua ex symbolo fidei profiteamur: *Credo unam, sanctam, catholicam & apostolicam Ecclesiam.*

CCCXVII. Ecclesiæ origo divina est, vi cuius hæc, quæ *militans* dicitur, cum *triumphante* copulata, & velut incorporata est.

CCCXVIII. Tabulæ divinæ originis & foundationis sunt sacra Scriptura & Traditio.

CCCXIX. Distincta ejus notio ex proprietatibus a Deo inditis, tanquam legibus fundamentalibus, perpetuisque & inconcussis desumitur. In his prima est unitas fidei, caritatis seu communionis, & capitis seu regiminis spiritualis.

CCCXX.



CCCXX. Altera proprietas in sanctitate sita est, quæ ex doctrina, virtute membrorum, & miraculorum gloria elucescit.

CCCXXI. Tertia est proprietas, quod sola sit catholica.

CCCXXII. Quarta denique, qua iure Apostolica censetur, origine doctrinæ & imperii sacri.

C. II.

Secundum consilia divinæ sapientiæ, & promissiones Christi Ecclesia usque ad finem mundi permanebit una, sancta, catholica & apostolica; etsi nullo non tempore gravissimis afflictæ sit, & affligatur vexationibus.

CCCXXIII. Divinus Servator de statu suo & ærumnis differens: *Beatus*, inquiebat, *qui non fuerit scandalizatus in me.* Matth. XI. 6. Idem accommodandum est ad Ecclesiam, cujus perpetuæ & gravissimæ persecutiones ab ipso Christo prædictæ sunt: *Hæc locutus sum vobis: ut, cum venerit hora, eorum reminiscamini; quia ego dixi vobis.* Joan. XVI. 4. Ac quando Ecclesiam supra petram ædificavit, ut portæ inferi prævalere haud possent; satis indicavit, eandem perpetuo impugnandam, nunquam expugnandam esse. Interest causas perscrutari & origines vexationum, & calamitatum, quibus Ecclesia identidem obnoxia est.

CCCXXIV. Inde saluberrima documenta manant pro iis maxime, qui arma, quibus defendenda est Ecclesia, ante abiiciunt, quam in hostes unquam strinxerint.

CCCXXV.



CCCXXV. Dogma de indefectibilitate activa & passiva Ecclesiæ ad ejusdem perspiciendam naturam ac regimen perpetuo præ oculis habendum est.

C. III.

In hunc finem, ut Ecclesia sit, maneatque una, sancta, catholica & apostolica, a Deo instituta est potestas sacra, & imperium sacrum.

CCCXXVI. Institutio sacri imperii in Ecclesia inchoatur ab institutione apostolatus: Ex discipulis seliguntur duodecim: ex duodecim eligitur unus, qui unitatis exordium est.

CCCXXVII. Ea unitas perficitur posito uno fundamento totius ædificii mystici, uno Pastore totius gregis, uno ex fratribus, qui omnes confirmare debeat.

CCCXXVIII. Distinctius expenditur locus Matth. XVI. ubi Petrus fit petra Ecclesiæ totius, & claves regni cœlorum accipit.

CCCXXIX. Dein Locus Luc. XII. ubi unus Petrus confirmare iubetur omnes.

CCCXXX. Denique Locus Joan. XXI. ubi unitas non fidei tantum, sed caritatis etiam & communionis expressius indicatur.

CCCXXXI. Hoc velut fundamento constituto dispiciendum est, quid in reliquos apostolos collatum sit a Christo; ac iura quidem extraordinaria apostolatus necessario segreganda sunt ab ordinariis iuribus Episcopatus in apostolis instituti.

CCCXXXII. Ut sacri imperii distincta comparetur notio, expenduntur ea, quæ ab apostolis vi illius imperii



perii acta, præscripta, & constituta sunt. Neque enim tanta cujusquam impudentia erit, tantaque impietas, ut apostolos alienam potestatem usurpasse, aut politico-
rum Principum propria iura sibi arrogasse dicat. Exercitium igitur potestatis, qua usi sunt apostoli, versabatur in prædicanda fide & mysteriis fidei, administrandis sacramentis, informandis moribus:

CCCXXXIII. Imperium sacrum aliis præterea iuribus constare, ex dictis & factis apostolorum constat; Non enim omnia, quæ disponenda erant, minutim a Christo determinata sunt; versabatur igitur id imperium


CCCXXXIV. In politia interna Ecclesiæ ordinanda circa conventus sacros, usum donorum divini Spiritus, orationes publicas, ieiunia, vigiliis, festa.

CCCXXXV. Præterea in electione, ordinatione, missione novorum ministrorum Ecclesiæ: in præscribendis qualitatibus ad statum clericalem requisitis, & constituendis regulis vitæ & honestatis clericorum.

CCCXXXVI. Ius etiam suum circa sacra celebranda comitia exercuerunt apostoli; in quibus de fide, necessaria morum honestate, & disciplina variabili actum est.

CCCXXXVII. Neque iidem nullam temporalium bonorum curam habuerunt, nempe ad finem Ecclesiæ propositum.

CCCXXXVIII. Exercendo hæc iura aliud non spectarunt apostoli, nisi ut Ecclesia esset, constanterque maneret *una*, unitate fidei, communionis sive caritatis, regiminis: *sancta* fide & moribus ope sacramentorum, verbi divini, exemplorum, & operum piorum: *catholica* per continuam propagationem in omnes mundi
par-



partes: *apostolica*, illibata doctrinæ & successionis origine conservata.

CCCXXXIX. Potestas, quam circa res ante commemoratas atque in finem mox explicatum apostoli exercuerunt, erat inspectoria, legislatoria, executoria.

C. IV.

Potestas sacra a Christo instituta ad successores apostolorum ob eundem finem transit, ut & Ecclesia esset, constanterque maneret una, sancta, catholica & apostolica.


CCCXL. Quemadmodum vera religio, atque Ecclesia supra Petram ædificata convelli nunquam potest; sic neque imperium & potestas sacra; quia secundum promissionem & institutionem Christi firmitas ædificii ex fundamento provenit, & passiva Ecclesiæ indefectibilitas ex activa pendet.

CCCXLI. Potestas in Petro instituta & transitura ad successores non erat prærogativa solius ordinis, honoris, aut directorii; sed vera potestas auctoritatis & iurisdictionis, & quidem supremæ, universalis, ordinariæ seu immediatæ.

CCCXLII. Hanc potestatem in successores S. Petri transiisse, docet, ac tenet S. Mater Ecclesia.

CCCXLIII. Ex successorum Petri potestate intelligitur, quomodo Ecclesia sit, & constanter maneat una, sancta, catholica & apostolica.

CCCXLIV. Ut de successoribus apostolorum rectum feratur iudicium, in primis segreganda extraordinaria
aposto-



apostolatus iura, quæ lege ordinaria in successores transferenda haud erant.

CCCXLV. At transierunt in Episcopos ordinaria iura, eum itidem in finem, ut Ecclesia sit, & constanter maneat una, sancta, catholica, & apostolica.

C. V.

Forma Ecclesiasticæ Hierarchiæ adumbratur, ac determinatur subiectum potestatis a Christo institutæ, atque ad posteros transmissæ.

CCCXLVI. Potestas in Petro & apostolis instituta tum ad publicum pertinet universæ Ecclesiæ regimen, tum ad peculiare functiones sacras; ac pro his quidem obeundis provide factum est, ut inferiores Episcopatu gradus a Christo instituerentur. Inter ipsos autem episcopos velut in culmine sacerdotii positos iustissimis ex causis gradus iurisdictionis determinati sunt.

CCCXLVII. Hierarchia ordinis ad augustissimum Eucharistiæ mysterium maxime refertur, in minores ac maiores tributa gradus, penitusque independens a laica auctoritate & potestate.

CCCXLVIII. Potestas iurisdictionis & regiminis pro foro interno & externo annexa est ordini hierarchico. Unde subiectum potestatis sacræ generatim est clerus: subiectum potestatis publicæ in Ecclesia est Episcopatus; a quo Papatus non ordine differt, sed eminentia auctoritatis & iurisdictionis. Potestas publica ab Episcopis exercetur vel singulis, vel congregatis in Syno-



Synodum. Imo & dispersi Episcopi, ceu unum *corpus* pastorum vel Ecclesia dispersa quidem, sed tamen una, considerantur.

CCCXLIX. Cum de origine graduum iurisdictionis episcopalis quaeritur, aliter de Primatu & Capite totius Ecclesiae, aliter de aliis gradibus est differendum.

CCCL. Antiquitas gradus & iuris Metropolitici primum indicatur:

CCCLI. Enumerantur dein gradus superiores Exarchorum, Primatum, & quorundam Archiepiscoporum.

CCCLII. Demum & Patriarcharum; ut palam fiat, quomodo infimi per medios, medii per superiores ad universale & commune unitatis centrum, apostolicam nempe sedem attrahantur.

CCLCIII. Cum Potestas publica & rectoria Ecclesiae penes Episcopos sit, Metropolitae, Exarchos, Primates, Patriarchas, maximeque penes Pastorem pastorum: iure quaeritur, quo sensu unus Episcopatus in Catholica sit, uti Veteres Patres loquebantur.

CCCLIV. Quatenus potestatem publicam Hierarchae exercent, recte exprimuntur *unitatis* nomine; ac si quis interroget, cui ea potestas data sit, videtur respondendum, eam *uni* datam esse, & *unitati*; non *unitantum*, nempe Petro, eiusque Successori; quia Episcoporum publica & rectoria potestas a Deo est instituta; neque *unitati tantum*; cum in S. Petro eiusque singulari successore ex divina institutione insit Primatus auctoritatis & iurisdictionis; cui subordinata est episcopalis potestas. Quando S. Petrus accipiendo claves regni coelorum repraesentasse Ecclesiam, frequenter a S. Augustino dicitur, id de Primatu S. Petri, eiusque Successore-

cessorum adeo nihil detrahît, ut secundum receptas in Iure publico gentiumque loquendi formulas eundem etiam confirmet; nam & Imperans civitatem, cui cum summo præest imperio, repræsentat; eoquod illud imperium non suo, sed civitatis bono commodoque teneat & exerat; nec illud ita alligatum personæ suæ, ut non transmittat in successores; quia civitas non moritur.

CCCLV. Erronea Richerii hypothesis iuste damnata & cum primum prolata, simul reiecta & explosa est.

CCCLVI. Si penes populum neque ex natura civilis unionis, neque ex libera Dei collatione quidquam potestatis spiritualis & ecclesiasticæ residet; quomodo inesse quidquam potest in Principe & Rectore populi? ac si populi securitatis causa in civitates coiverunt, iidemque partem naturalis libertatis non alio abdicarunt consilio, quam ut potiore eius partem tuerentur salvam; certe nulla in re libertas minus restricta per civilem nexum cogitari potest, quam ut suum quisque civium salutis sempiternæ negotium secundum Dei præscriptum ductumque agere tuto libereque possit. Siquis igitur finem civitatis, mediaque eidem fini consentanea, si principia iuris ex fine profluentia, si obiecta expendat; non potest non apertissimam utriusque potestatis, Ecclesiasticæ & civilis differentiam intueri.

CCCLVII. Recensentur instabiles Protestantium de sacro regimine hypotheses.

CCCLVIII. Cum de subiecto supremæ in Ecclesia potestatis agitur, recentiores Doctores Theologiæ quæstionem movent de præeminentia Conciliorum supra Papam, aut Papæ supra Concilia: Plenam eius rei trac-



stationem Theologi sibi vindicarunt, quibus & relinquimus. Sed tamen quid generatim idea institutæ in Petro pontificiæ potestatis, quid ratio fundamenti, cui Ecclesia innititur, quid analogia principiorum iuris dictet: quid denique ipsi perspexerint Protestantes ex catholico systemate Romanæ Ecclesiæ, quod videre nolunt quidam catholici Doctores, indicatur.

CCCLIX. Ex determinatione subiecti, in quo sacrum imperium inest, forma status & imperii Ecclesiastici pendet. Duo tamen ante indicanda sunt, quam de illa statuatur; nempe 1. quos *limites* habeat & suprema Vicarii Christi, & subordinata Episcoporum potestas: 2. quam *plena*, aut minus plena censi utraque debeat. De quovis enim imperio, utrumne absolutum sit, an limitatum, disquiritur; itemque, subiectum, in quo imperium inest, cunctis ne polleat iuribus ad eius finem pertinentibus, an quædam divisa, atque in aliud subiectum collata sint. Quando igitur ex genuinis fontibus tum magnitudo Pontificiæ potestatis, tum limites patefiunt, una intelliguntur iniustæ eorum querelæ seu potius calumniæ, quibus a Doctore catholicis ultra modum exaggerari pontificiam potestatem indignantur.

CCCLX. Si suprema Vicarii Christi potestas suis non caret limitibus, nihil magnopere mirum videri debet, subordinatæ Episcoporum potestati, istiusmodi esse positos limites, quorum ratio ex natura ac fine Episcopalis potestatis, determinatio vero ex Ecclesiæ, id est, Conciliorum & Papæ dispositione pendet. Quapropter de Diocesium finibus, de vi generalium Ecclesiæ legum, de reservationum & exemptionum iure hoc maxime loco generatim cognoscendum est.



CCCLXI. Postquam de limitibus Pontificiæ & Episcopalis potestatis actum est, altera relinquitur quæstio, quam plena sit potestas utraque. Summo Pontifici plenitudinem potestatis fuisse concessam a Deo, ambigi non potest. In partem eius plenitudinis vocati sunt Episcopi, quando & ipsi, etsi adstrictam ad Dioceses potestatem habeant, tamen vi unitatis catholice, etiam catholice consulunt Ecclesie. Romani Pontificis suprema est illa quidem, non tamen sola potestas rectoria, neque eius potestatis unicum subiectum, neque legum & iurisdictionis solus ipse fons nuncupari potest; quemadmodum in politicis nuncupatur rex, qui pleno imperio solus potitur. Quodsi nunquam defuerint, nec in posterum defuturi sunt Episcopi magno numero, qui in causis etiam disciplinae cum Romano consentiant Episcopo; id divinae adscribendum est providentiae, non quod Pontificia sententia Episcoporum consensui, tanquam limiti potestatis, sit alligata.

CCCLXII. Ex iis, quae praemissa sunt, de forma sacri imperii, ac de natura sacrae huius societatis haud difficulter videtur pronunciari posse. Est igitur Ecclesia, societas legalis — inaequalis, — perfecta, adeoque sacer quidam status. — Istius status forma nequaquam Democratica est, nec Aristocratica, neque penitus Monarchica, neque systemati civitatum similis, neque tam mixta ex Aristocratia & Monarchia, quam monarchica ex Aristocratia limitata, temperata; discrimen maximum ab aliis profanis formis singularis prærogativa unitatis efficit, huius sacrae societatis maxime propria. Et quamquam de loquendi formulis, quando de re constat, magnopere laborandum haud sit; tamen si parum aptæ sint



ex formulæ, cito a veritate rei ipsius homines abducuntur; præfertim cum expressiones profanorum imperiorum propriæ, haud ita multo tempore ad res Ecclesiasticas transferri cœptæ sint.

CCCLXIII. Ad hanc de subiecto sacrae potestatis tractationem referenda videtur celebris controversia non tam de origine potestatis episcopalis, quæ certe divina est, quam derivatione eiusdem in certum subiectum; utrumne immediate a Deo, an ex plenitudine seu pleno fonte potestatis ecclesiasticæ petenda sit. Ac differt sane propagatio a successione, quæ sine antecessore cogitari non potest. §. CCVII. aut certe alia proprie, alia improprie dicta successio statuenda est. Episcopi, etsi sedem teneant, in qua nullus antecesserit Apostolorum, tamen eorum successores vocantur, eo etiam ex capite, quod perinde participes sint eius plenitudinis, qua Christi Vicarius gaudet, ac Apostoli erant. Conf. CCCLXI. (b)

C. VI.

Expenduntur varia relationum, nexuum ac respectuum genera, quæ inter statum ecclesiasticum & civilem, ac utriusque potestatis negotia exaggerari solent ab hodiernis scriptoribus non paucis.

CCCLIV. Est hæc quasi appendicula eius positionis, qua potestas sacra a civili independens, liberaque, ac summa in genere ecclesiasticarum rerum statuitur. Hodierni Scriptores id verbis concedunt: re tollunt: tot enim consingunt artes arctandi sacrum imperium, tot nexus, relationesque excogitant sacrarum rerum, & civilium, quæ penes potestatem politicam sunt, ut sacra potestas
aut

aut nulla sit, aut in manibus civilium magistratuum quaeri debeat.

CCCLXV. Expenditur vis & veritas eius dicti, quo frequenter utuntur: Ecclesia in statu est (civili), non e contrario status in Ecclesia.

CCCLXVI. Imperium sacrum regimini civili tanquam formidandum exhibent: Principi ius cavendi tribuunt, nequid detrimenti ex negotiis Ecclesiae civitas capiat.

CCCLXVII. Bonum publicum obiectant contra usum sacrae potestatis.

CCCLXVIII. Potestas civilis, an & quatenus respiciat felicitatem aeternam, ac salutis ac religionis officia.

CCCLXIX. Advocatia Principum, an libertati Ecclesiae officere debeat.

C. VII.

Demonstrato sacrae potestatis subiecto praecipua illius obiecta considerantur, atque, imprimis causae fidei, ac divini iuris.

CCCLXX. In re tam ampla, qualis est Iuris ecclesiastici publici tractatio, non modo via & ordine procedi necesse est, sed saepe ad eundem rerum ordinem, feriemque advertendus animus, ne qua idearum cognitionumque confusio oriatur.

CCCLXXI. Palmaria veritas huius loci propria praefigitur: Extra veram catholicam fidem nemo salvus esse potest: idque Ecclesia Romano-Catholica constanter docuit.



CCCLXXII. Ecclesia potestatem suam exercuit circa rectum usum SS. Scripturarum:

CCCLXXIII. Et vim Traditionum tuendam.

CCCLXXIV. Dein ad causas fidei pertinet præscriptio Symbolorum: examen librorum & doctrinarum.

CCCLXXV. Expenditur modus, quo Ecclesia in causis fidei ac divini iuris procedit.

CCCLXXVI. In iis causis præcipuæ partes sunt Rom. Pontificis.

CCCLXXVII. Ius Episcoporum in causis iisdem.

CCCLXXVIII. Officia Advocatorum Ecclesiæ in protegenda fide, ac divino iure,

C. VIII.

Post causas fidei, eiusque unitatis conservandæ nihil statum publicum Ecclesiæ propius attingit, quam unitas caritatis & communionis.


CCCLXXIX. Eius unitatis in Ecclesia Christi necessitas inquirenda, solerterque expendenda est.

CCCLXXX. Eidem obest Schisma:

CCCLXXXI. Illustrantur dicta exemplo Schismatis Novatiani.

CCCLXXXII. Ab unitate caritatis & communionis segregat excommunicatio.

CCCLXXXIII. Denique iura Pontificis, Episcoporum, Principum pro conservanda hac unitate indicantur.



C. IX.

Etsi Ecclesia Christi sit catholica; multi tamen in orbe terrarum sunt homines, qui in eam nunquam ingrediuntur: non pauci, qui perfide egrediuntur, aut iniuste eiiciuntur. Quare indicandum est, quæ erga istiusmodi homines iura sint, & officia Ecclesiæ.

CCCLXXXIV. *Ex iis, quæ adhuc deducta sunt, distincte intelligi demum potest, quis Sanctæ Ecclesiæ membrum reipsa sit, & haberi debeat.*

CCCLXXXV. *Sectariorum conventicula non sunt Ecclesiæ veri nominis.*

CCCLXXXVI. *Interest, causas discessionis eorundem scrutari.*

CCCLXXXVII. *Diversi gradus tolerantiae designantur.*

CCCLXXXVIII. *Rationes eiusdem ponderantur.*

C. X.


Post causas fidei & unitatis disciplina Ecclesiæ generatim spectanda est, tanquam obiectum potestatis sacrae, & advocatiæ Principum.

CCCLXXXIX. *Disciplinae summa genera quatuor constituuntur.*

CCCXC. *Quid iuris divini sit, aut referri ad disciplinam variabilem debeat, Ecclesia definit.*

CCCXCI. *Eadem iure gaudet informandi, ac constituendi disciplinam.*

CCCXCII. *Regulae de mutatione disciplinae.*



CCCXCIII. De qua re multa falso opinantur nonnulli.

CCCXCIV. Memorabilis disciplinæ articulus ea sunt impedimenta dirimentia matrimonii, quae iuri divino attribui nequeunt.

C. XI.

Enumerantur obiecta quædam particularia, circa quæ potestas sacra & rectoria Ecclesiæ versatur.

CCCXCV. Ius Papæ, Episcoporum, Principum circa Concilia. Duplici sane modo spectari possunt Concilia, tum ut subiectum sacræ potestatis, tum ut obiectum eiusdem. Nam circa convocationem eorundem, celebrationem, confirmationem & executionem variis iuribus atque obligationibus afficiuntur & sacri Hierarchæ, & politici Principes.

CCCXCVI. Ius circa creandos Ecclesiæ ministros.


CCCXCVII. Ius circa bona temporalia Ecclesiarum.

CCCXCVIII. Ius circa usum & exercitium potestatis, sive regimen Ecclesiæ.

CCCXCIX. Speciatim circa iudicia Ecclesiastica;

CCCC. Circa promulgationem legum Ecclesiæ.

CCCCI. Placetum regium, anne necessarium sit pro regimine Ecclesiæ.



POSITIONES SELECTÆ
EX
IURISPRUDENTIA
NATURALI, ET POSITIVA,




AD DILUCULARIOS.

Ita omnium rerum novarum immoderatus amor
se habet, ut ipsa sui novitate sibi & aliis admirandus
in primis ferveat, citiusque sperato tepescat. Præ-
stringit oculos corusci instar splendoris; qui sicut re-
pentinus se ingerit, sic vix visus recedit. Itaque no-
ctem illustrat, ut densiores tenebras recedens relin-
quat.

Petrus Cluniacensis Libro II. Epistola 33.





E X

IURE NATURÆ

PRIVATO.

I.

Doctrina Iuris naturalis ab aliis extracta ac separata disciplinis ingentia commoda affert candidatis sublimiorum scientiarum. At abstracta a dogmate de existentia summi Dei, eiusque perfectionibus, & immortalitate animorum, ea doctrina manca est, infirma, & perniciofa.

II.

Inquisitio naturalis Iuris a contemplatione theoretica naturæ, maximeque hominis inchoanda est, a qua provehimur ad practicas cognitiones, ipsa vi naturali cogitandi erutas.

III

Practicæ cognitiones ex contemplatione naturæ provenientes tria nobis exhibent: 1. Iura seu facultates a natura concessas: 2. Obligationes a natura impositas: 3. Consilia ab eadem natura nobis proposita.

IV.



IV.

Obligatio naturalis vi vocis denotat vinculum, sed nempe accommodatum naturæ mentis intelligentis, validissimum, & internum; unde si notio imaginaria reducatur ad realem, haud ægre intelligitur, aliam esse activam, aliam passivam obligationem: illam in voluntate seu iussu summi Dei sitam esse: non quamvis connexionem motivi cum actione pro obligatione iactitari posse.

V.

Cum varia sint obligationum ac iurium naturalium genera, eorum omnium veluti communis fons ac principium investigari solet, idque in natura rerum hominisque, ejusque diverso statu videtur constituendum.

VI.

Natura autem hominis, si complete spectetur, necessariam involvit connexionem, seu relationem aut dependentiam a supremo Conditorum rerum, Gubernatore, ac Fine ultimo beatitudinis; ut adeo parum intersit, eane natura complete sumpta, an divinæ perfectiones principium esse dicantur naturalium obligationum ac iurium.

VII.

VII.

Principia, quibus Thomas Hobbes in statum primogenium naturæ invexit bellum omnium in omnes, viam ac modum docent, in Iure publico miscendi sacra & profana.

VIII.

Præter facultates & obligationes naturæ, in humanis actionibus adiuncta quoque varia, & fines agentium considerari debent, ut intelligatur earum moralitas completa.

IX.

Alia præterea est plurimorum actuum affectio, qua validi dicuntur, aut irriti: in horum numero sunt illi, qui gravi & iniusto metu extorquentur.

X.

Spektatis principiis naturæ apte ad binas classes reducitur ea, quæ vulgo tripartita statuitur, officiorum divisio; sunt enim officia hominis erga Deum, & hominis erga hominem.

XI.

Officia hominis erga Deum, seu officia religionis partim absoluta sunt, partim hypothetica, quæ posito supernaturali hominis fine, statuque



tuque religionis revelatæ per sese consequuntur.

XII.

Posito eo statu nulla est Autonomia, seu ius in negotio religionis pro suo arbitrio sentiendi, ac statuendi.

XIII.

Differt sane indifferentismus a tolerantia, tolerantia a favore sectis exhibito, favor a iure interno secundum genuinam notionem intellecto.


XIV.

Qui ex formula Pii IV. animo sincere tenet, & ore publice profitetur: *Extra hanc veram catholicam fidem* (in eo symbolo expositam) *nemo salvus esse potest*; nequit de intolerantia accusari; & qui prædicationi eius veritatis adversatur, revera prædicationi religionis catholicæ adversatur.

XV.

Officia hominis erga hominem numero pondere & mensura respondent analysi completæ naturæ hominis.

XVI.



XVI.

Lex naturalis de conservatione sui ipsius non obstat, quo minus periculo mortis se quis exponat, confitendo veram fidem, exercendo insignem caritatem, pugnando contra hostes patriæ.

XVII.

Eadem vero lex obstat autochiriæ.

XVIII.

Omnis deliberata locutio contra mentem repugnat naturali iuri; neque in sensu quorundam auctorum admitti potest distinctio inter mendacium & falsiloquium.

XIX.

Specialia iura & officia hominis erga hominem determinat tristis favor necessitatis.

XX.

Defensio cruenta cum moderamine inculpatae tutelæ per se concessa est: ob adiuncta fieri potest, ut sit præcepta, aut prohibita.

XXI.

Eadem locum non habet pro defensione honoris; unde duellum sive monomachia proprie dicta prohibita est iure naturali & divino, etiam pro statu hominis naturali, aut civitatis
male.



male ordinatæ, ita ut semper illicitum sit, acceptare vel offerre duellum ad servandas cum honore fortunas, etiam tum, quando alio remedio earum iactura propulsari nequit: nec ullus metus amittendæ famæ & officii excuset a transgressione naturalis legis.

XXII.

Extrema necessitas non reducit communionem bonorum, neque proprietatem dat, sed solum usum, aut etiam consumptionem concedit; at non aliter, nisi cum onere restituendi vel compensandi, postea quam necessitas transacta, & restituendi facultas præsto est.


XXIII.

Uti frequentissima hominum negotia, sic & plurima officia ac iura versantur circa res externas ad vitæ humanæ necessitatem, commoditatem & honestam iucunditatem conditas. Earum rerum spectato primigenio statu non alia intelligitur communio; nisi negativa.

XXIV.

Modi acquirendi primitivi sunt occupatio, & accessio. Ius tamen occupandi occupari non potest.

XXV.



XXV.

Testamenti factio, & præscriptio valde consentaneæ eæ quidem sunt æquitati naturali: ius tamen firmum non præstant absque adminiculo legis positivæ. Difficilior est definitio de successione ab intestato inter parentes & liberos.

XXVI,

Ut iura & obligationes ex pactis & contractibus provenientes determinentur, spectanda est materia pacti, ius paciscendi, & consensus paciscentium.

XXVII.

Pactum sub turpi conditione initum nullam producit obligationem, etiam impleta iam conditione.

XXVIII.

Ex ignorantia vel neglectu officiorum circa res externas frequens oritur obligatio restituendi, quod alteri debitum est. Hæc autem propositio: extra contractus duæ sunt radices restitutionis: *res accepta*, & *iniusta* (formaliter) *acceptio*; non esse principium videtur, sed thesis magnopere controversa.


XXIX.

Qui proprietatem loquendi, ut oportet, in scientiis sectantur, non inepte ita statuunt: *nulla est culpa iuridica*.



XXX.

Iuri naturali conveniens est, ut possessor bonæ fidei simul cum re evicta restituat fructus tam extantes, quam ita consumptos, ut inde locupletior evaserit, sive patrimonium suum auxerit. Huic naturali æquitati obstare potest rationabilis tribunalium praxis, aut præscriptio possessoris; leges Romanæ, quæ contra eam afferuntur, non ita claræ sunt, ut recedendum ab ea sit.



EX

IURE NATURÆ


SOCIALI.

XXXI.

A Societate veri nominis differt turba, & quodvis genus conventiculorum, quæ contra leges conflantur.

XXXII.

Quando in collegiis per suffragia negotium decidendum est, in quæstionibus AN? absque maioriæ suffragiorum frequenter obtinet calculus Minervæ. In quæstionibus QUOMODO? necessaria regulariter est eorum pluralitas: in certis tamen negotiis non sufficit. Exempla sup-
petunt



petunt tum ex SS. Canonibus, tum ex constitutione impetii Germanici, tum ex natura ipsius negotii.

XXXIII.

In electionibus Prælatorum optime statutum est, ut attendatur non tantum ad maiorem, sed etiam ad saniores partem suffragantium. In aliis negotiis, in quibus collegium non dependet a superiore, suffragia numeranda, non ponderanda sunt.

XXXIV.

Imperium societatis inæqualis recte in tres veluti partes dividitur, inspectoriæ, legislatoriæ, & executoriæ.

XXXV.


Societates simplices sunt coniugalis, parentalis, & herilis; ex tribus hisce, vel binis exurgit societas composita familiæ.

XXXVI.

Obligatio conservandæ & propagandæ speciei afficit universos, non singulos.

XXXVII.

Error Personæ iure naturæ dirimit matrimonii contractum: non item error qualitatis, etsi sit antecedens: neque error circa causam impulsivam, nisi transeat in conditionem, cui




expresse alligatur intentio contrahentis; quod tamen non præsumitur, nec facile permittitur in contractu matrimonii.

XXXVIII.

Qui post sponsalia gravi & iniusto metu contracta & iuramento confirmata, contrahit cessante metu matrimonium, non censendus est, agere ex virtute religionis, aut iustitiæ.

XXXIX.

Nulla datur servitus originaria.



EX

IURE NATURÆ

PUB L I C O.

LX.

Status civilis non est a iure naturæ præceptivo.

XLI.

Secundum receptas de modis acquirendi ideas nullus est *originarius* modus acquirendi imperii civilis.

XLII.



XLII.

Digna est vox Maieſtate Imperantis, Principem propter populum eſſe, non populum propter Principem.

XLIII.

Cum præcipuus civitatum finis ſecuritas ſit eorum, qui in civitate degunt, hæc etiam exiſtimationi & honori eorundem præſtanda eſt. Et quamvis divinus Servator miniſtris & diſcipulis ſuis acerbiffima odia prædixerit, & maledicta & probra, quibus onerandi eſſent propter nomen ſuum; hoc tamen vaticinium eventu non carebit, eſſi politica poteſtas ſeveras leges ſanciat contra inſectatores miniſtrorum religionis & hoſtes ſtatus Eccleſiaſtici.

XLIV.

Sapientiſſimæ ſunt cautelæ, quas Politia adhibet, & laudabilia remedia, quæ præſcribit, ne lues, quæ in vicinia graſſatur, territorium corripiat, vel ut homines aquis hauſti, frigore torpentes, aut de cælo perculſi ſenſuum uſum recuperent; a potiori commendandæ ſunt leges, per quas Principes cavent, ne erroribus Sectariorum inficiantur orthodoxi, aut Sectarii ipſi in erroribus computreſcant.



XLV.

Dictum illud, quo sæpe utuntur quidam Scriptores: *Ecclesia est in statu* (civili), *non e contrario status in Ecclesia*; si secundum verborum proprietatem examinetur, falsum est; etsi improprio quodam sensu admitti possit: quocunque sumatur significatu, contra sacra Ecclesiæ iura nihil efficiet, nisi quis hypothesin Sectariorum, sive systema territoriale, ut vocant, tacite assumat, & Ecclesiam regimini seculari subiciat.

XLVI.

In iudiciis non datur casus pro Amico.

XLVII.

Iudex reum, quem privata scientia certo scit esse innocentem, nec in causa civili, nec criminali condemnare potest, etsi videatur probari nocens.

XLVIII.

Res iudicata non habet locum in conscientia, si postea de iure partis certo constet, aliisque titulus non accedat.

XLIX.



XLIX.

Lex prohibens vel irritans actum, in utroque foro tam interno quam externo eum prohibere vel irritare censenda est. Fieri tamen potest, ut lex positiva, quæ actum simpliciter irritare videtur, non omnem ei valorem etiam pro foro interno auferat, siqua obligatio eidem actui aliunde competit:

L.

Exemplum præbet ius Romanum circa actus quosdam pupillorum sine consensu tutoris initos.

LI.

Qui e territorio egreditur, ut obligationem legis evitet, neque obligationem legis, neque peccatum reipsa evitat.



EX

IURE NATURALI

GENTIUM.

LII.

Si confusa veterum Iurisconsultorum Romanorum de Iure gentium idea revocetur ad distinctam, nullum relinquitur Ius gentium voluntarium, a naturali diversum.



LIII.

Gentis nomine non quæcunque familiarum multitudo venit, sed ea duntaxat, quæ communi imperio securitatis causa constituto regitur, quæcunque imperii seu regiminis forma sit;

LIV.

Igitur homines vagi, palantesque in insulis, & silvis, nullo summo imperio consociati, in quibus magis aggregatio, quam societas familiarum conspicitur: itemque latronum turba eum in finem conglomerata, ut alias invadant regiones: aut factio rebellium, aut denique populus a suo Principe desciscens gentium jure, ac nomine nequaquam gaudent.

LV.

Qui inter veram Christi Ecclesiam, & sectas ab ea avulsas, ac inter semet dissidentes principia iuris gentium locum habere fingunt, indifferentismi videntur patrociniū suscepisse.

LXI.

Oceanus secundum totam suam vastitatem spectatus nativa sua libertate gaudet, nulli subiectus

iectus; quoad minores tamen tractus & quoad sinus dominium non respuit, nec vincula conventionum.

LVII.

Præscriptioni inter gentes admittendæ non favent ea, quæ Ammonitarum regi terram Israel invadenti a Jephthe in responsis data sunt. Iudic. XI. 26.

LVIII.

Exceptio metus non perinde in iure gentium, ac iure naturæ privato locum habet.

LIX.


Iusta belli inferendi causa non est crescens vicinæ gentis potentia, aut æquilibrium.

LX.

Non Christiani ducis, sed furentis hominis est, nullo suo bono nocere alteri genti, & ea perdere, quæ nec hosti vires adimant, nec perenti emolumentum afferant.

LXI.


Ceterum qui servato naturæ iure receptam inter cultiores gentes bellandi consuetudinem non observaverit, non alia ex causa violati iuris



gentium argui potest, ac ille imperitiæ inter gladiatores accusatur, qui adversarium non secundum regulas ærtis vulneravit.

LXII.

Quando A. 1444. Cardinalis Iulianus Uladislao Hungariæ & Poloniæ Regi declaravit, eum pacificatione cum Amurathe II. inita non ligari; nihil dixit, vel suasit contra principia Iuris gentium; multoque minus Eugenius P. IV. qui totum id ratum postea habuit.



E X

IURE ECCLESIASTICO

PUBLICO.

LXIII.

Circa ius Sacrorum Protestantes Germaniæ varias hucusque hypotheses excogitarunt pro opportunitate temporum & circumstantiarum. Solum Systema catholicum, quo ius istud tribuitur Prælati Ecclesiasticis, nititur principiis solidis & stabilibus.

LXIV.

LXIV.

Nomine autem iuris Sacrorum & causarum religionis non sola venit authentica declaratio dogmatum, sed inde a primis seculis eo nomine intelligebantur alia negotia Ecclesiastica, ceu causæ Episcoporum, determinatio limitum Dioeceseon vel Patriarchatum, administratio bonorum Ecclesiæ temporalium.

LXV.

Nihil tam dissonum, secumque ipso pugnans excogitari facile potest, quam doctrina quorundam Scriptorum, qui spreta ultimorum temporum disciplina extollunt veterem, & insuperhabito veteri fidei zelo tolerantiam commendant sectarum a fide Romano - Catholica alienarum.

LXVI.

Capitulares electuri Episcopum, eiusdem potestatem nec in sacris, nec in temporalibus per capitulationes etiam iureiurando munitas limitare possunt.

LXVII.

Electionem sui ad Prælaturam licite acceptare non potest, qui ex occulto defectu scit se indignum esse.

LXVIII.



LXVIII.

Cum Episcopi Germaniæ duplicem agant personam, & Hierarchæ sacri in centrum unitatis tendentis, & Principis Imperii; merito etiam duplicis iuramenti vinculo sese adstringunt.

LXIX.

Matrimonii contractus inter fideles regitur legibus naturalibus, politicis, & Ecclesiasticis, eo nempe fine ac gradu, quem unaquæque lex habet propositum.

LXX.


Illi fini ac gradui perquam conformis fuit declaratio A. 1629. edita a Ludovico XIII. Galliæ Rege, qua edixit, leges politicas de nullitate matrimoniorum, quoad effectus civiles duntaxat, & in foro externo, non autem quoad substantiam & nullitatem intrinsecam intelligendas esse. Teste Fevretio Iurisconsulti Galli non aliter interpretati sunt edicta regia.

LXXI.

Si lex Pontificia generalis, & non mere declaratoria Romæ promulgata in provinciis speciatim non promulgetur, subditi ab eius observatione regulariter excusantur ex præsumpta voluntate Summi Pontificis non urgentis observationem



tionem legis in provincia; hæc tamen præsumtio cedit veritati certo cognitæ de contraria voluntate Ecclesiastici Legislatoris.



EX

IURE ECCLESIASTICO


P R I V A T O .

LXXII.

Cum principiis iuris naturalis de valore actuum penitus consentit declaratio a S. Gregorio P. VII. facta Henrico Episcopo Leodiensi, ab Arnulpho Comite iniuste exspoliato, atque ad iurandum vi adactò, quod res ablatas nunquam repetere, ac prædatori veniam a Papa impetrare velit. De hoc iuramento ita rescripsit Sanctissimus Papa: *De iuramenti iniustissima obligatione Dilectioni tuæ sic respondemus, non debere existimari, Eam ullis iuramenti vinculis posse teneri, quæ tam nefandissime coacta iuraverit.* Hartzheim Concil. Germ. T. III. p. 189.

LXXIII.

Provide tamen cavent sacri Canones, ne, qui metu coactum se iurasse causatur, suo unius iudi-



iudicio de religione iurisiurandi definiat. Quocirca idem Sanctus Pontifex in suo ad Episcopum responso addidit: *Unde & apostolica te auctoritate absolvimus, ut non tuæ vel alicuius conscientie ob hoc videaris annexus, aut debitor esse.*

LXXIV.

Iuramenta secundum principia naturalis iuris non modo ob vim & metum, sed ex aliis præterea causis sæpe invalida sunt; perpetuo tamen cavent sacri Canones, nequando nomen Dei videatur in vanum fuisse assumptum. Hinc si iuratum est de usuris solvendis, aut solutis non repetendis, aut de non agendo super repetitione earundem; decisum est, ut creditores usurarii districtione Ecclesiastica compellantur, ea iuramenta relaxare, & ab exactiōe usurarum desistere, & quidem ante earum solutionem; uti statuitur c. 1. de Iureiurando; & c. tuas. 13. de Usuris.

LXXV.

In celebri cap. Debitores. 6. de Iureiur. ita statuitur: *Debitores, si de usurarum solutione iuraverint, cogendi sunt Domino reddere iuramentum. Et cum usuræ solutæ fuerint, creditores ad eas restituendas sunt Ecclesiastica severitate, si necesse fuerit, compellendi. Ut hæc decisio concilietur cum*



cum aliis Canonibus, neque ut nugatoria explodi possit, cum Innocentio P. IV. in commentario eiusdem capituli opinamur, tunc demum debitores, si de solutione usurarum iuraverint, cogendos esse domino reddere iuramentum, quando de promissione usuraria iudici non constat, aut quando iudex parte altera non audita, eoquod sui copiam non faciat, aut tempus solutionis iam instet, illud ex officio relaxare nequit. Sed hoc ipso casu, si postmodum de usuraria pravitate compertum sit, creditores ad usuras restituendas, sunt Ecclesiastica severitate, si necesse fuerit, compellendi.

LXXVI.

Sponsalia inter impeditos impedimento iuris humani, inita sub conditione: *Si Papa dispensaverit*; non sunt vera ac valida sponsalia, quæ impedimentum publicæ honestatis, aliosque effectus producant.

LXXVII.

Spektata naturali æquitate & mente SS. Canonum beneficium restitutionis in integrum non videtur denegandum sponſis minorennibus in contractu sponsalizio graviter læsis, si occurrentes circumstantiæ, quæ aliis negotiis circa hoc beneficium sunt communes, illud postulare videan-



videantur. Atque hoc remedio sponsi consulent conscientiae suae, quae per solam exceptionem denegatae actionis minime tuta est.

LXXVIII.

Inter personas consanguineas in linea obliqua, quarum una a communi stipite distat primo gradu, altera quinto, citra dispensationem licite & valide contrahitur matrimonium. Positio est contra Carpzovium Ictum acatholicum, de usu arboris consanguinitatis. N. XXX. Casum factum, non fictum refert Gobat Tract. IX. Cas. VII. n. 164.

LXXIX.

Vitricus valide ducit in matrimonium eam, quae sui privigni iam defuncti uxor erat: & noverca eum, qui privignae defunctae maritus fuit.

LXXX.

Impedimentum criminis etiam is incurrit, qui tempore, quo crimen commisit, ignoravit, annexum eidem esse iure Ecclesiastico tale impedimentum, dirimens matrimonium.

LXXXI.

Ex eo, quod sciens ius alienum liberetur ab obligatione servitutis rusticae, inferri non potest,



test, quod scientia iuris alieni non obstat præscriptioni. Unde debitum indefinite contractum triginta annorum lapsu extingui cum scientia iuris alieni, nequaquam arbitramur.

LXXXII.


Qui obligatus solvere annum censum, vel præstationem in certo genere monetæ aut frugum, ultra longissimum tempus in alio, & quidem minoris valoris genere solvit, is præscribet primæ obligationi solvendi, & quidem unico actu tam pro præterito tempore, quam futuro.

LXXXIII.

Actiōni pignoratitiæ directæ quovis longissimo tempore non præscribit creditor pignus possidens; ac proin debitor oblato & exsoluto, vel rite deposito debito, iure optimo repetit pignus, non obstante cursu temporis longissimi.

LXXXIV.

Beneficiati obligantur ex iustitia bona beneficalia superflua erogare in causas pias, ita, ut totum id, quod in usus profanos ex iisdem profuderunt, causis piis compensare, & restituere teneantur.



LXXXV.

Successor particularis non tenetur solvere decimas præteritas ab antecessore non solutas.

LXXXVI.

Promittere vel dare, exigere vel accipere aliquid temporale pro ingressu ordinis religiosi, est simonia iuris divini & naturalis.

LXXXVII.

Omnis pactio simoniaca iure naturæ irrita est, & nulla; unde prono alveo fluunt regulæ de restitutione eius, quod simoniace acceptum est.

LXXXVIII.


Usura mere lucratoria iure naturali & divino est prohibita; nec ulla universali Germaniæ lege permittitur. A contractu autem mutui differt contractus censualis etiam redimibilis ex utraque parte.

LXXXIX.

Usuram continet pactum Antichreseos, & lex commissoria pignori adiecta, quod valore debitum superat.

XC.

Iurisconsultus Iulianus L. 29. Digestorum memorabilem de testamentis casum ac decisionem refert, exhibitam l. si ita. 13. D. de liberis & posthumis hæredibus: „*Si filius mihi natus fuerit, ex beſſe hæres eſto: ex reliqua parte uxor mea hæres eſto; ſi uero filia mihi nata fuerit, ex triente hæres eſto: ex reliqua parte uxor hæres eſto; & filius & filia nati eſſent: dicendum, aſſem distribuendum eſſe in ſeptem partes, ut ex his filius quatuor, uxor duas, filia unam partem habeat: ita enim ſecundum voluntatem teſtantis, filius altero tanto amplius habebit, quam uxor; item uxor altero tanto amplius, quam filia. Licet enim ſubtili iuris regulæ conveniebat, ruptum fieri teſtamentum; attamen cum ex utroque nato teſtator voluerit uxorem aliquid habere; ideo ad huiusmodi ſententiam, humanitate ſuggerente decurſum eſt.*“ Secundum hanc decisionem in dividenda hæreditate ſervata eſt proportio a teſtatore aſſignata, quam invenire pro omni caſu non ita expeditum eſt, ac in eo, quem Iulianus attulit. Quid enim? ſi ita ſcriptum ſit: *Si filius mihi natus fuerit, huic obveniant quinque, matri quatuor partes; ſi nata filia: huic dentur ſeptem, matri novem partes: ſi naſcantur ambo, quantum*



tum debetur utrique secundum priorem decidendi regulam? generalem solutionem felix algebra subministrat. Sit tota hæreditas a . portio filii ad portionem matris $= m : n$; portio matris ad portionem filiae $= o : p$; dicanturque portiones filii, matris, filiae x, y, z ;

$$\text{eritque } y = \frac{ano}{mo + no + np} \cdot x = \frac{amo}{mo + no + np} \cdot$$

$$z = \frac{anp}{mo + no + np} \cdot$$

O. A. M. D. G.



Errata.

Corrige.

Pag. lin.

10	2	fervi	fervis
20	33	rationibus	actionibus
21	35	cenſuum	fenſuum
100	14	eaque ſint, æqualia	eaque æqualia
141	ult.	(1)	(2)
142	28	non eſt Deus	non eſt Deus (9)
172	22	(3)	(2)
189	34	—	<i>adde</i> (5) l. eum, qui. 18. princ. D. de Iniuriis dicta. (2)
235	23	dicta	dicta. (2)
254	15	(5)	(6)
262	28 &		
	29	dominorum	dominiorum
277	32	iuris. (3)	<i>deleatur</i> (3)
	37	(3)	(4)
288	27	(1)	(2)
289	25	(5)	(3)
329	14	—	<i>adde</i> (2)
412	27	ac Puſendorſius	<i>adde</i> : (3)
443	5	(1)	(2)
464	39	—	<i>adde</i> : (9)
470	18	—	<i>deleatur</i> (8)
476	20	(1)	(2)
479	ult.	—	<i>deleatur nota</i> (4)
488	11	ac ſecus	an ſecus
513	12	proſequentes	perſequentes
549	15	Phleg	Phaleg
569	ult.	motas	motus
576	7	(1)	(2)
620	19	municatione	communicatione
671	25	—	<i>addatur</i> (10)
675	20	—	<i>adde</i> : (12)
677	20	ſcripſit	ſcripſi
701	ult.	confirmarent	confirmaret
734	28	dinem	ordinem
749	18	da opera	ea opera
753	14	ſinitur	ſinitur
813	2	ſuccendendi	ſuccedendi
817	26	—	<i>adde</i> : (14) Ibid. loc. cit.
831	20	diurna	diuturna





1777



